

ROM

Pol a Yesus aqa wau tamo

¹ E Pol. E Kristus Yesus aqa wau tamo. A na e metbej deqa e Qotei aqa anjam bole mare mare laqnum. E wau di yqajqa deqa a na e giltbej.

² Tulanj nami Qotei a marej, “Ijo anjam bole di aqa damu bunuqna brantqas.” Onaqa Qotei aqa medabu o qaji tamo naŋgi anjam bole di neŋgreŋyonab soqnej. Neŋgreŋ di Qotei aqa segi neŋgreŋ.

³ Qotei aqa anjam bole di aqa segi Niri aqa anjam. Aqa Niri a tamo bulyosiqa Devit aqa leŋ na ḥambabej.

⁴ Onaqa bunuqna Qotei na a subq na tigeltej. Tigeltonaqa batı deqa aqa Mondor Bole na iga endegsi osorgej, Yesus a Qotei aqa Niri siŋgila koba. A gago Tamo Koba Yesus Kristus.

⁵ Yesus aqa siŋgila na Qotei a iga qa are boleiyej. Osıqa Yesus aqa niam na iga wau egej. Deqa iga aqa anjam maro tamo unum. Tamo uŋgasari sawa sawa kalilq di unub qaji naŋgi Yesus qa naŋgo areqalo siŋgilatosib aqa anjam dauryqajqa deqa are qalsiq wau egej.

⁶ Niŋgi dego Yesus Kristus na metŋej deqa niŋgi aqa anjam dauryeqnub.

⁷ Qotei na niŋgi Rom qureq di unub qaji niŋgi tulanj qalaqlainqeŋnu. A na niŋgi metŋej deqa niŋgi aqa segi tamo uŋgasari unub. O ijo was, e anjam endi neŋgreŋyosim nunŋoq qariŋyonum. Gago Abu Qotei wo Tamo Koba Yesus Kristus wo

naŋgi aiyel niŋgi qa are boleinjrimqa niŋgi lawo na soqniy.

Pol a marej, “E Rom Kristen naŋgi unjrqai”

⁸ E mati niŋgi anjam bei mernŋwai. Niŋgi Yesus Kristus qa nunjo areqalo singilateqnub deqa tamo unŋgasari gargekoba naŋgi niŋgi qa saoqnsib laqnableba sawa sawa kalilq di naŋgi queqnub. E deqa are qaloqnsim Yesus Kristus aqa ñam na ijo Qotei minjeqnum, “Keretonum.”

⁹ E ijo are miligi singilatosim deqa e Qotei aqa wau ojoqnsim aqa Niri aqa anjam bole palontqnsim laqnum. Qotei a segi qalie, bati gaigai e pailyqa oqnsim niŋgi qa are qaleqnum.

¹⁰ E gaigai niŋgi qa endegsi pailyeqnum, “O Qotei, ni na merbimqa e gam itosiy aisiy Rom Kristen naŋgi unjrqai.”

¹¹ O ijo was, e niŋgi nuŋgwajqa are koba qaleqnum. Di kiyaqa? E Mondor aqa anjam niŋgi mernŋitqa dena nunjo are singilateŋgwajqa deqa.

¹² Ijo are koba endegsi unu. E nuŋgoq bosiy niŋgi Yesus qa nunjo areqalo singilateqnub di unsiyqa dena ijo are singilatqai. Niŋgi dego e Yesus qa ijo areqalo singilateqnum di unsibqa dena nunjo are singilatqab. Gam dena iga kalil koba na gago are singilatoqnsim sqom.

¹³ O was niŋgi endegsib qalieoiy. Bati gargekoba e bosiy niŋgi nuŋgwajqa are qaleqnum. Ariya e nuŋgoq bqajqa gam gaigai geteŋeqnu. Ijo are koba endegsi unu. Tamo unŋgasari sawa bei beiq di unub qaji naŋgo ambleq di e waueqnamqa naŋgi are bulyoqnsib Yesus qa naŋgo areqalo singilateqnub dego kere e nunjo ambleq di wauoqnitqa tamo

quidei naŋgi are bulyoqnsib Yesus qa naŋgo are-qalo siŋgilatoqnqab.

¹⁴ E na Grik tamo naŋgi ti yauŋ tamo naŋgi ti powo tamo naŋgi ti nanari tamo naŋgi ti Yesus aqa anjam minjroqnit quqwajqa deqa Qotei na e wau ebej.

¹⁵ Deqa niŋgi Rom qureq di unub qaji niŋgi dego e na Yesus aqa anjam bole merngoqnit quqwajqa are prugbeqnu.

Yesus aqa anjam bole a Qotei aqa siŋgila ti unu

¹⁶ E Yesus aqa anjam bole di marqajqa jemai-bosaieqnu. Di kiyaqa? Anjam bole di Qotei aqa siŋgila ti unu. Siŋgila dena Qotei na tamo kalil Yesus qa naŋgo areqalo siŋgilateqnub qaji naŋgi padalqa gamq na eleŋeqnu. A matiq Juda naŋgi eleŋeqnu. Osiqa sawa bei bei qaji naŋgi dego eleŋeqnu.

¹⁷ Anjam bole dena Qotei na iga tamo bole une saiqoji sqajqa gam osorgej. Gam agiende. Iga Yesus qa gago areqalo siŋgilatqom gam dena qujai Qotei na iga tamo bole une saiqoji qa mergwas. Gam bei saiqoji. Agi Qotei aqa anjam bei nami endegsib neŋgrenyeb unu, “Tamo naŋgi Qotei qa naŋgo areqalo siŋgilatqab di a na naŋgi tamo bole une saiqoji qa minjrqas. Yim naŋgi ŋambile gaigai sqab.”

Tamo uŋgasari kalil naŋgi na Qotei qoreiyeqnub

¹⁸ Iga qalie, Qotei a laŋ goge di sosiqa aqa minjinj boleq ateqnu. A na tamo uŋgasari kalil a qoreiy-oqnsib kumbra uge uge yeqnub qaji naŋgi awai uge enjreqnu. Naŋgo kumbra uge dena naŋgi Qotei aqa anjam bole tenteqnub.

19 Tamo uŋgasari naŋgi di Qotei aqa kumbra qalie bole. Qotei a segi na naŋgi aqa kumbra osornjreqnu. Ariya naŋgi olo Qotei qoreiyeqnub deqa a na naŋgi awai uge enjreqnu.

20 Qotei a nami mandam ti iŋgi iŋgi kalil ti gereiyonaq sonaq aqa maŋwa di tamo uŋgasari naŋgi unoqneb dena bosiq agi bini naŋgi uneqnub. Gam dena naŋgi Qotei aqa kumbra uliejunu qaji di qalieonub. Aqa kumbra utru ti aqa singila gaigai sqas qaji deqa ti naŋgi qalie bole. Deqa tamo bei a marqa kerasai, “E Qotei qaliesai deqa e une saiqojo.”

21 Naŋgi Qotei qa qalie unub. Ariya naŋgi aqa ñam soqtqa uratoqnsib a biŋiyqa asginjreqnu. A segi Qotei bole naŋgi deqa are qalo-saieqnub. Naŋgo kumbra dena naŋgi nanaritnjro-qnsiq naŋgo areqalo getentetnjreqnu. Deqa naŋgi ambruq di laqnub.

22 Naŋgi diqoqnsib mareqnub, “Iga powo koba ti unum.” Di gisan. Naŋgi tulan nanarioqnsib unub.

23 Sosibqa Qotei ḥambile gaigaiunu qaji a qoreiyoqnsib a qa louqajqa uratoqnsib olo beloqnsib mandam tamo ti qebari ti wagme ti amal ti naŋgo sulum gereiyoqnsib naŋgi qa loueqnub.

Tamo uŋgasari naŋgi kumbra uge uge yeqnub

24 Tamo uŋgasari naŋgi Qotei qoreiyeqnub deqa a na kamba naŋgi uratnjreqnaqa naŋgi kumbra tulan uge uge jigat yoqnqajqa are prugnjreqnu. Kumbra dena naŋgi na naŋgo segi jejamu tulan ugeugeiyeqnub.

25 Tamo uŋgasari deqaji naŋgi Qotei aqa anjam bole uratoqnsib olo beloqnsib gisan anjam segi

dauryeqnub. Deqa naŋgi Qotei qoreiyoqnsib iŋgi iŋgi kalil a na gereinjrej qaji di biŋinjroqnsib naŋgo sorgomq di unub. O ijo was, Qotei a iŋgi iŋgi kalil qa utru deqa iga bati gaigai aqa ñam soqtoqnqom. Bole.

²⁶ Tamo uŋgasari naŋgi di Qotei qoreiyeqnu^b deqa a na kamba naŋgi uratnjreqnaqa naŋgi jemai kumbra tulaŋ uge uge yoqñqajqa are prugnjreqnu. Naŋgo jemai kumbra agiende. Uŋgasari naŋgi tamo ti ŋereŋqajqa uratoqnsibqa uŋa bei bei wo ŋereŋeqnub.

²⁷ Tamo naŋgi dego uŋa ti ŋereŋqajqa uratoqnsibqa tamo bei bei wo ŋereŋqajqa are tulaŋ prugnjreqnu. Naŋgi jemai kumbra di yeqnu^b deqa Qotei a naŋgi kambatnjroqnsiqa naŋgo jejamuq di awai tulaŋ ugedamu enjreqnu.

²⁸ Naŋgi Qotei aqa sorgomq di sqajqa are qalo-saieqnu^b deqa Qotei na naŋgi uratnjreqnaqa naŋgi naŋgo segi areqalo uge uge dauryoqnsib kumbra uge uge yeqnu^b.

²⁹ Naŋgo kumbra uge agiende. Naŋgi kumbra bole tintiŋ yqajqa torei urateqnu^b. Naŋgi ñoro koba oqajqa mamaulnjreqnu. Naŋgi tamo naŋgi jeutnjreqnu^b. Naŋgi tamo qudei iŋgi koba ti unub qaji naŋgi qa are ugeinjreqnu. Naŋgi tamo naŋgi ñumoqnsib moiyotnjreqnu^b. Naŋgi laŋa laŋa ŋirinjoqnsib gisaŋ anjam mareqnu^b. Naŋgi tamo qudei naŋgo iŋgi iŋgi laŋa yainjreqnu^b. Naŋgi tamo qudei naŋgi ugeugeinjreqnu^b. Kumbra kalil di naŋgoq di tulaŋ koba unu. Naŋgi yomueqnu^b.

³⁰ Naŋgi gisaŋ na tamo naŋgo ñam ugetetnjreqnu^b. Naŋgi Qotei jeuteqnu^b. Naŋgi diqoqnsib laqnsib naŋgo segi ñam soqteqnu^b. Naŋgi kumbra

uge uge bunuj babtelenjeqnub. Nañgi nañgo ai abu nañgo medabu gotrañyeqnub.

³¹ Nañgi areqalo bole ti sosaaieqnub. Nañgi nañgo segi anjam bei dauryqa maroqnsib olo dauryqa urateqnub. Nangi tamo qudei nañgi qalaqalain-jrosaaieqnub. Nangi tamo qudei nañgi qa dulosaaieqnub.

³² Qotei aqa dal anjam endegsi unu, “Tamo ungasari kumbra uge deqaji yeqnub qaji nañgi ñumib moreñebe.” Dal anjam degsi unu. Tamo ungasari nañgi di Qotei aqa dal anjam qalie bole. Ariya nañgi olo gotrañyoqnsib kumbra uge uge yeqnub. Di segi sai. Tamo ungasari nañgi dena tamo qudei nañgi kumbra uge uge deqaji yeqnab unjroqnsib nañgo ñam soqtetnjroqnsib minjreqnub, “Keretonub. Niñgi kumbra degyoqniy.”

2

Qotei a une tamo nañgi awai uge enjrqas

¹ O tamo, ni que. Ni une saiqoji unum ni degsi marqa keresai. Kumbra uge uge tamo ungasari nañgi yeqnub qaji di ni segi dego yeqnum. Deqa ni na tamo ungasari nañgo jejamuq di une qametnjreqnum di ni segi dego ino jejamuq di une qameqnum.

² Iga qalie, tamo ungasari kumbra uge uge yeqnub qaji nañgi Qotei na kamba peginjrsim awai uge enjrqas. Qotei a kere nañgi awai uge enjrqas.

³ Ni na tamo ungasari kumbra uge uge yeqnub qaji nañgo jejamuq di une qametnjreqnum ariya kumbra nañgi yeqnub qaji di ni segi dego yeqnum.

Deqa ni kiyersi are qalonum? Qotei na tamo uñgasari nañgi di peginjrsim awai uge enjrqas ariya a ni awai uge emqasai. Ni degsi are qalonum kiyo? Di sai.

⁴ Ni que. Qotei a gaigai kumbra tulañ boledamu ni emoqnsiqa a ni qa tarinjsokobaiyeqnu. A urur ni awai uge emosaieqnu. Qotei aqa kumbra bole di ni unsim olo uge qa marsim gotrañyqam e? Degaim. Qotei a ni are bulyqajqa deqa are qaloqnsiq kumbra bole osormeqnu. Ni di qaliesai kiyo?

⁵ Ariya ino are miligi geteñejunu deqa ni are bu-lyosai. Ino kumbra dena ni ino awai uge tumbol ateqnum. Deqa mondon dijo batiamqa Qotei a kumbra tintañ na tamo uñgasari nañgi peginjrsim aqa minjinj boleq atsimqa a na nañgi ni ombla awai tulan ugedamu engwasi.

⁶ Ni qalie, dijo bati qa Qotei na tamo uñgasari kalil nañgo kumbra kambatosim awai segi segi enjrqas.

⁷ Tamo uñgasari qudei nañgi singila na tigeloqnsib kumbra bole bole yoqnsib lañ qure qa gam itqajqa waukobaeqnub. Osib nañgi lañ qureq di ñam koba oqajqa ti so bole gaigai sqajqa ti tulan singilaeqnub. Deqa Qotei na tamo uñgasari nañgi di awai boledamu enjrim nañgi ñambile gaigai sqab.

⁸ Ariya tamo uñgasari qudei nañgi nañgo segi jejamu qa are qaloqnsib anjam bole gotrañyoqnsib kumbra uge uge yeqnub. Deqa Qotei na tamo uñgasari nañgi di awai ugedamu enjrsim nañgi qa minjinj oqetqas.

⁹ Nañgi kumbra uge uge yeqnub deqa mondon nañgi gulbe koba ti jaqatinj koba ti oqab. Matiq Juda nañgi oqab. Bunuqna sawa bei bei qaji nañgi

dego oqab.

10 Ariya tamo uñgasari kumbra bole bole yeqnub qaji nañgi Qotei na aqaryainjrimqa nañgi lañ qureq oqsib dia ñam koba ti lawo ti so bole gaigai sqab. Matiq a Juda nañgi aqaryainjrqas. Bunuqna a sawa bei bei qaji nañgi dego aqaryainjrqas.

11 Qotei aqa ñamgalaq di tamo uñgasari kalil nañgi kerekere unub. Deqa a nañgo ñam qa are qalsim nañgi peginjrqasai.

12 Ningi quiy. Tamo qudei nañgi dal anjam qaliesai. Di uñgum. Nañgi une yeqnub deqa nañgi kalil padalqab. Tamo qudei nañgi dal anjam qalie unub. Di dego uñgum. Nañgi une yeqnub deqa Qotei na nañgi peginjrqas. A dal anjam aqa wau na nañgi peginjrqas.

13 Tamo nañgi dal anjam laña queqnub qaji nañgi Qotei aqa ñamgalaq di tamo bolesai. Tamo nañgi dal anjam quoqnsib dauryeqnub qaji nañgi segi Qotei aqa ñamgalaq di tamo bole sqab.

14 Bole, sawa bei bei qaji nañgi dal anjam qaliesai. Ariya nañgi nango segi areqalo na dal anjam mutu qudei dauryeqnub. Dena iga poigwo, dal anjam a nañgo areqaloq di nami sosiq waquoqnej.

15-16 Qotei a nango are miliqiq di dal anjam nengreñyobulej deqa nañgi kumbra bole ti kumbra uge ti qalie unub. Deqa mondon diño batiamqa nango areqalo qudei na nañgi minjrqas, “Nunjo kumbra di uge.” Osim nañgo areqalo qudei na olo nañgi minjrqas, “Nunjo kumbra di bole.” Bati deqa Qotei na tamo uñgasari nañgo kumbra kalil nañgo are miliqiq di uliejunu qaji di boleq atekritosim dena nañgi peginjrqas. A Kristus Yesus aqa

wau na naŋgi peginjrqas. Anjam bole e palonte-qnum qaji aqa damu degsi unu.

Juda tamo naŋgi are qaleqnub, “Iga dal anjam ti unum deqa iga kere unum”

¹⁷ O Juda tamo, niŋgi qudei endegsib are qaleqnub, “Iga dal anjam ti unum deqa Qotei na iga pegigwasai.” Osib niŋgi nuŋgo segi ñam soqto-qnsib endegsib mareqnub, “Iga Qotei aqa tamo unum.

¹⁸ Iga Qotei aqa areqalo qalieonum. Qotei na aqa dal anjam iga osorgej deqa iga kumbra bole kalil qa tulaŋ arearetgeqnu.”

¹⁹⁻²⁰ Osib niŋgi endegsib are qaleqnub, “Iga dal anjam qalie unum deqa iga powo bole ti anjam bole ti ejenum. Deqa iga na tamo ungasari ñam qandimo unub qaji naŋgi gam osornjreqnum. Iga na tamo ungasari ambruq di unub qaji naŋgi suwantnjreqnum. Iga na tamo ungasari powo saiqoji unub qaji naŋgi powo enjreqnum. Iga na tamo ungasari angro kiñilala bulosib nanarieqnub qaji naŋgi Qotei aqa anjam aqa damu osornjreqnum.”

²¹ O Juda tamo, kiyaqa niŋgi gaigai dal anjam plaltoqnsib ariya niŋgi olo dal anjam di dauryo-saeqnub? Niŋgi mareqnub, “Bajin̄aib.” Ariya niŋgi olo bajin̄eqnub.

²² Niŋgi mareqnub, “Niŋgi tamo bei aqa uŋa jejamu ojetaib.” Ariya niŋgi olo was bei aqa ñauŋ jejamu ojeteqnub. Niŋgi gisan̄ qotei naŋgi qa asgin̄eqnub. Ariya niŋgi olo gisan̄ qotei naŋgo atra talq dena sulum bajin̄eqnub.

23 Niñgi nuñgo segi ñam soqtoqnsib mareqnub, “Iga Qotei aqa dal anjam qalie bole.” Ariya ningi olo dal anjam di gotranjyeqnub. Nuñgo kumbra dena ningi Qotei aqa ñam ugeteqnub.

24 Agi Qotei aqa anjam bei nami ningi qa endegsib neñgreñyeb unu, “Nuñgo kumbra uge di sawa bei bei qaji nañgi unoqnsib Qotei aqa ñam misiliñyeqnub.”

Tamo yai a Juda tamo bole?

25 Bole, ni muluñ aiqa marsim ni mati dal anjam dauryoqñqam di kere. Ariya ni dal anjam gotranjyoqnsim laña muluñ aiqam di keresai. Ino kumbra dena ni tamo muluñ aiyosai qaji nañgi bulqam.

26 Deqa tamo bei muluñ aiyosai qaji a dal anjam dauryoqñqas di a tamo muluñ aiyeqnub qaji nañgi bul sqas.

27 Bole, niñgi Juda tamo unub deqa niñgi dal anjam ejunub. Niñgi muluñ degó aiyeqnub. Ariya ningi dal anjam gotranjyqab di tamo muluñ aiyosaieqnub qaji nañgi na mernjgwab, “Niñgi une ti.” Nañgi na degsib mernjgwab. Di kiyaqa? Nañgi dal anjam dauryeqnub deqa. Nañgi muluñ aiyosai di unjum.

28 Tamo bei a laña babañ na Juda tamo sqas di a Juda tamo bolesai. Aqa jejamu segi osim muluñ aiqas di aqa muluñ bolesai.

29 Tamo a aqa are miligiq na Juda tamo sqas di a Juda tamo bole. A aqa are miligiq na muluñ aiqas di aqa muluñ bole. A na aqa jejamu laña osim dal anjam dauryqas di keresai. Qotei aqa Mondor na a siñgila yimqa aqa are miligiq na a muluñ bole

aiqas di kere. Tamo di a Qotei aqa ɻamgalaq di ɻam
ti sqas. A mandam tamo naŋgo ɻamgalaq di ɻam ti
sqasai.

3

Qotei a kumbra bole tiŋtiŋ na tamo naŋgi pegin-jrqaſ

¹ O ijo was, niŋgi kamba e merbqab kiyo, “O Pol, ni degsi maronum deqa uŋgum, iga Juda tamo unum di laŋa. Iga mulun aiyem di dego laŋa.” O was niŋgi e degsib merbaib.

² Niŋgi quiy. Qotei a Juda naŋgo baŋq di ingi bole bole atej. Ingi bole bei agiende. A na Juda naŋgi aqa anjam taqatqa osiq wau enrej.

³ Bole, Juda qudei naŋgi Qotei aqa anjam di naŋgo areqaloq di singilatosaeqnub. Osib aqa anjam di dauryosaieqnub. Deqa iga endegsi marqom kiyo, “Qotei a dego aqa segi anjam di dauryosaieqnub”?

⁴ O ijo was, iga degsi marqasai bole sai. Iga endegsi marqom, “Tamo kalil naŋgi gisan tamo. Qotei a segi qujai gisan tamo sai. A anjam bole gaigai maroqnsiq a olo uratosaeqnub.” Agi Qotei aqa anjam bei nami endegsib nengrenyeb unu, “O Qotei, ino anjam kalil bole.

Deqa tamo qudei na ni pegimqa laqnibqa ni olo naŋgi tulan buŋnjrsim ni une saiqoji sqam.”

⁵⁻⁶ Deqa ijo was, niŋgi kamba olo e endegsib merbqab kiyo, “O Pol, ni marobulonum, ‘Iga kumbra uge yoqñqom gam dena Qotei aqa segi kumbra bole olo brantoqñqas.’ O Pol, ni degsi marobulonum deqa iga kamba marqom, ‘Degwas di Qotei

a kiyaqa gago une qa ñirinjoseim awai uge egwas? Qotei aqa kumbra di uge.' Degsi marqom e?" O ijo was, iga degsi marqasai bole sai. Qotei a gaigai kumbra bole segi yeqnu. A kumbra bole yosai qamu a kiyersim tamo unjgasari kalil nañgi pegin-jrjas? Di kerasai. Nunjo areqalo di mandam tamo nañgo areqalo.

⁷ Ariya ningi olo e endegsib merbqab kiyo, "O Pol, ni marobulonum, 'Iga gisan anjam maroqn-imqa gam dena Qotei aqa anjam bole olo brantognim aqa ñam tulañ goge oqoqnqas.' O Pol, ni degsi marobulonum deqa iga kamba marqom, 'Degwas di Qotei a kiyaqa iga une tamo qa mergsim awai uge egwas?' " O ijo was, nunjo anjam di tulañ uge.

⁸ Anjam uge deqaji tamo qudei nañgi mare mare laqnub. Agi nañgi endegsib mareqnub, "Unjgum, iga kumbra uge uge yoqnnom. Yim gam dena kumbra bole olo brantognqas. Pol a anjam degsi palonteqnu." O ijo was, tamo qudei nañgi degsib iga yomuigosib mareqnub. Di gisan koba. Nañgo kumbra uge dena Qotei na nañgi awai ugedamu enjrjas.

Tamo bole bei sosai

⁹ Deqa iga kiyersi marqom? Iga Juda tamo unum deqa iga na tamo kalil nañgi buñnjreqnum degsi marqom e? Iga degsi marqasai. E nami mernjgonum, iga Juda ti Grik ti kalil une na kabut-gejunu.

¹⁰ Agi Qotei aqa anjam bei nami endegsib nengreñyeb unu,

"Tamo bole bei sosai.

Qujai bei a Qotei aqa kumbra bole dauryosaieqnu.

Tamo dego bei sosai.

11 Tamo qujai bei a Qotei qa poiyo saieqnu.

Qujai bei a Qotei itqa are qalosaieqnu. Tamo dego bei sosai.

12 Tamo kalil naŋgi gam bole uratekriteqnub.

Naŋgi kalil tamo uge.

Qujai bei a kumbra bole dauryosaieqnu. Sai bole sai.

13 Naŋgi kalil anjam uge marelenjeqnub.

Tamo moiyo qaji sub waqesonaq tamo naŋgo je-jamu sub miliqiq di qusaeqnu
dego kere tamo kalil naŋgo medabu na anjam tulan uge uge mareqnub.

Naŋgi gisəŋ anjam koba marelenjeqnub.

Amal uge na tamo uñinjreqnub dego kere tamo kalil naŋgo medabu na tamo naŋgi tulan ugetnjreqnub.

14 Osib gaigai naŋgo medabu na tamo naŋgi qa anjam uge maroqnsib naŋgi qa are ugein-jreqnu.

15 Naŋgi bati gaigai tamo ñumsib moiyo njqajqa urur ti gileqnub.

16 Naŋgi na tamo naŋgi ugeugeinjrqajqa are qalo-qnsib gulbe koba enjreqnub.

17 Naŋgi lawo kumbra qaliesai.

18 Naŋgi Qotei yala ulaiyosaieqnub.”

O ijo was, Qotei aqa anjam nami degsib neŋgreŋye unu.

19 Iga qalie, Moses a tamo uŋgasari dal anjam ejunub qaji naŋgi qa are qalsiq dal anjam neŋgreŋyej. Deqa tamo bei a endegsi marqa keresai, “E tamo bole. E une saiqoji.” A degsi marqa

keresai. Iga tamo ungasari kalil mandamq endi unum qaji iga Qotei aqa ɣamgalaq di une ti unum.

20 Deqa tamo bei a dal anjam dauryosim dena a Qotei aqa ɣamgalaq di tamo bole une saiqoji sqa keresai. Sai bole sai. Dal anjam na gago une iga osorgeqnu. Di segi.

*Iga Jesus qa gago areqalo siŋgilatqom di iga tamo
bole sqom*

21 O ijo was, iga Qotei aqa ɣamgalaq di tamo bole sqajqa gam bei unu. Iga dal anjam dauryqom gam dena sai. Qotei na gam bei babbosiq iga osorgej. Nami Moses a gam deqa marsiq dal anjamq di neŋgreŋyej. Qotei aqa medabu o qaji tamo kalil naŋgi dego gam deqa marsib anjam neŋgreŋyeb.

22 Gam agiende. Tamo ungasari kalil Yesus Kristus qa nango areqalo siŋgilateqnub qaji naŋgi Qotei na tamo bole une saiqoji qa minjreqnu. Gam di segi. Gam bei saiqoji.

23 Iga kalil une ateqnum deqa iga laŋ qureq oqsim dia Qotei itqa keresai.

24 Iga degsi unum deqa Qotei na iga aqaryaigwa osiqa iga qa are boleiyosiq Kristus Yesus qarinyonaqa a bosiq iga awaigej. Gam dena Qotei na iga tamo bole une saiqoji qa mergeqnu. Di gago segi kumbra bole na sai. Qotei a Kristus Yesus aqa wau na iga laŋa awaigej.

25 Agi Qotei a endegsi are qalej. A na Yesus qarinyim bosim moiym aqa leŋ aisim tamo ungasari kalil a qa nango areqalo siŋgilateqnub qaji nango une taqal waiyosim Qotei aqa minjinj kobotqas. Wau dena Qotei na iga tamo bole une saiqoji qa mergeqnu. Aqa wau di a na boleq

atsiq iga osorgej. Nami Qotei a tamo naŋgi qa tarinjsokobaiyoqnej. Deqa a naŋgo une qa naŋgi urur kambatnjrosaioqnej.

26 Ariya bini bati endi Qotei na iga endegsi osorgeqnu, a gaigai kumbra bole tinctin yeqnu. A na tamo uŋgasari Yesus qa naŋgo areqalo singilateqnub qaji naŋgi tamo bole une saiqoji qa minjreqnu di a laŋa minjrosaieqnu. A Yesus aqa wau na naŋgi tamo bole une saiqoji qa minjreqnu. Dena iga qalieonum, a kumbra bole tinctin yeqnu.

27 Deqa tamo yai na aqa segi ñam soqtqa kere? Tamo dego bei sosai. Iga gago segi ñam soqtqajqa kumbra di torei koboej. Gam kiye na kumbra di koboej? Iga dal anjam dauryqom gam dena sai. Iga Yesus qa gago areqalo singilatqom gam dena qujai iga gago ñam soqtqajqa kumbra di koboej.

28 Bini iga qalieonum, iga Yesus qa gago areqalo singilatqom gam dena qujai iga Qotei aqa ñamgalaq di tamo bole une saiqoji sqom. Iga dal anjam dauryqom gam dena sai.

29 Deqa iga kiyersi marqom? Qotei a Juda naŋgo segi Qotei e? A sawa bei bei qaji naŋgo Qotei sai e? Di sai. A sawa bei bei qaji naŋgo Qotei dego.

30 Qotei a segi qujai Qotei bole. Deqa mulun aiyo qaji tamo naŋgi ti mulun aiyosiaeinqub qaji tamo naŋgi ti Yesus qa naŋgo areqalo singilatqab di Qotei a naŋgi kalil turtnjrsim tamo bole une saiqoji qa minjrqas.

31 Iga maronum, iga Yesus qa gago areqalo singilatqom di iga tamo bole une saiqoji sqom. Gago anjam dena iga dal anjam ugeteqnum e? Sai. Iga dal anjam olo singilateqnum.

4*Abraham a Qotei aqa ɻamgalaq di tamo bole so-qnej*

¹ Abraham a iga bul mandam tamo. A gago moma utru. Deqa iga a qa kiyersi marqom?

² Abraham a wau bole yoqnej gam dena a Qotei aqa ɻamgalaq di tamo bole soqnej iga degsi marqom e? Sai. Iga degsi maronum qamu Abraham a aqa segi ñam soqtqa kere qamu.

³ Ariya Qotei aqa anjam kiye neŋgreŋq di unu? Anjam agiende. “Abraham a Qotei qa aqa areqalo singilatej gam dena Qotei na a tamo bole une saiqoji qa minjej.”

⁴ Iga qalie, tamo a wauqas di a awai oqas. A laŋa awai oqasai. A wauosim dena awai oqas.

⁵ Ariya tamo bei a Qotei aqa ɻamgalaq di tamo bole sqa marsimqa a kiyerqas? E marqai. A wauosaiosim Qotei qa aqa areqalo singilatqas. A degyqas di Qotei na a tamo bole une saiqoji qa minjqas. Iga qalie, Qotei na tamo naŋgi a qoreiye-qnub qaji naŋgi tamo bole une saiqoji qa minjre-qnun.

⁶ Tamo naŋgi di wau bole yeqnub kiyo sai kiyo di uŋgum. Qotei a naŋgi tamo bole une saiqoji qa minjreqnu. Yeqnaqa naŋgi tulan̄ arebolebolein-jreqnu. Devit a nami anjam deqaji marej.

⁷ Agi a endegsi marej,
“Qotei a tamo naŋgo kumbra uge qa are walyimqa naŋgo une kobotetnjqras di
naŋgi tulan̄ areboleboleinjrqas.

⁸ Tamo Koba a tamo naŋgo une qa olo bunu are qalqasai di

naŋgi tulanj areboleboleinjrqas.”

⁹ Deqa iga kiyersi marqom? Tamo muluŋ aiyo qaji naŋgi segi areboleboleinjrqas e? Tamo muluŋ aiyosaieqnub qaji naŋgi dego areboleboleinjrqas e? Od. Naŋgi kalil koba na areboleboleinjrqas. Agi iga mareqnum, Abraham a Qotei qa aqa areqalo siŋgilatej gam dena Qotei na a tamo bole une saiqoji qa minjej.

¹⁰ Ariya Abraham a kiyersi sonaqa Qotei na a tamо bole une saiqoji qa minjej? A nami muluŋ aiyej kiyo a muluŋ aiyosaisoqnej kiyo? Od, Abraham a muluŋ aiyosaisonaqa Qotei na a tamо bole une saiqoji qa minjej.

¹¹ A muluŋ aiyosaisoqnej bati deqa a Qotei qa aqa areqalo siŋgilatej. Deqa Qotei na a tamо bole une saiqoji qa minjej. Osiga a toqor bei yej. Toqor di agi Qotei na Abraham muluŋ waiyej. Deqa iga endegsi qalieonum, Abraham a tamо kalil muluŋ aiyosaisosib naŋgo areqalo Qotei qa siŋgilateqnub qaji naŋgo moma matu.

¹² A tamо naŋgi muluŋ aiyeqnub qaji naŋgo moma matu dego. Ariya tamо naŋgi naŋgo jejamu laŋa oqnsib muluŋ aiyeqnub qaji a naŋgo moma matu sai. Tamo naŋgi muluŋ aiyooqnsib olo Abraham aqa kumbra dego dauryeqnub qaji a naŋgo moma matu bole. Gago moma matu Abraham aqa kumbra agiende. A muluŋ aiyosaisosiqa Qotei qa aqa areqalo siŋgilatej.

Tamo uŋgasari Qotei qa naŋgo areqalo siŋgilateqnub qaji naŋgi iŋgi bole bole oqab

¹³ Nami Qotei na Abraham aqa moma naŋgi ti endegsi minjrej, “E niŋgi mandam kalil enjgwi.”

Abraham a dal anjam dauryej deqa Qotei a anjam di marosai. A Qotei qa aqa areqalo singilatej deqa Qotei a anjam di marej. Osiqa Abraham a tamo bole une saiqoji qa minjej.

¹⁴ Tamo nangi dal anjam dauryqab gam dena Qotei na nangi ingi bole bole enjrqa marej qamu iga Qotei qa gago areqalo singilateqnum kumbra di laja ulonej qamu. Qotei aqa anjam marej qaji di dego laja ulonej qamu.

¹⁵ Iga qalie, dal anjamunu deqa tamo nangi dal anjam gotranjyeqnabqa Qotei a naŋgo une deqa minjinj oqeteqnu. Dal anjam sosai qamu iga na tamo nangi endegsi minjrqa keresai qamu, “Ninji dal anjam gotranjyeqnub.”

¹⁶ Qotei a Abraham qa ti aqa moma bunuqna branteqnub qaji naŋgi qa ti are boleiyosiq ingi bole bole naŋgi enjrqa marej. Deqa tamo nangi Abraham aqa kumbra dauryosib Qotei qa naŋgo areqalo singilateqnub qaji naŋgi ingi bole bole di oqab. Tamo nangi dal anjam ejunub qaji naŋgi segi ingi di oqasai. Tamo kalil Qotei qa naŋgo areqalo singilateqnub qaji naŋgi dego ingi di oqab. Abraham a iga kalil gago moma matu.

¹⁷ Agi Qotei aqa anjam bei nami endegsib neŋgreŋyeb unu, “O Abraham, e ni giltmem deqa ni tamo ungasari sawa sawa kalilq di unub qaji naŋgo moma matu sqam.” O ijo was niŋgi quiy. Abraham a Qotei qa aqa areqalo singilatej deqa a Qotei aqa ŋamgalaq di gago moma matu unu. Qotei qujai di tamo moreŋo qaji naŋgi olo subq na tigeltnjreqnu. A segi na marnaqa ingi ingi kalil nami sosai qaji di brantelenej.

¹⁸ Qotei a kiyersim aqa anjam a nami Abraham

minjej qaji di dauryqas di Abraham a poiyosai. Ariya a Qotei qa aqa areqalo siñgilatosiq marej, “Bole, Qotei na aqa anjam di dauryqas.” Aqa kumbra dena a tamo ungasari gargekoba sawa sawa kalilq di unub qaji nañgo moma matu brantej. Agi Qotei a nami Abraham endegsi minjej, “Ino moma nañgi tulan̄ gargekobaqab.”

¹⁹ Abraham a aŋgro saiqoji soqnej. Aqa wausau 100. Deqa aqa siñgila koboej. Aqa ɻauŋ Sara a dego tulan̄ qeliej. Deqa a aŋgrotqa keresai. Abraham a di qalieosiq ariya a Qotei qa aqa areqalo siñgilatqa uratosai.

²⁰ Anjam Qotei na nami minjej qaji a deqa are qalsiq soqnej. A areqalo aiyeltosai. A Qotei qa aqa areqalo siñgilatosiq aqa ñam soqtoqnej.

²¹ A endegsi qalieej, “Bole, anjam Qotei na nami merbej qaji di a dauryqa kere.”

²² Abraham a degsi Qotei qa aqa areqalo siñgilatej deqa Qotei na a tamo bole une saiqoji qa minjej.

²³ Anjam di Qotei aqa neñgrenq di unu. Anjam agiende, “Qotei na Abraham a tamo bole une saiqoji qa minjej.” Anjam di Abraham qa segi neñgrenyosai.

²⁴ Iga kalil qa dego anjam di neñgrenyeb. Iga dego Qotei qa gago areqalo siñgilateqnum deqa Qotei na iga tamo bole une saiqoji qa mergeqnu. Qotei agi gago Tamo Koba Yesus subq na tigeltej qaji a qa gago areqalo siñgilateqnum.

²⁵ Qotei a Yesus uratonaqa jeu tamo nañgi na a qalnab moiyej. Qotei na Yesus degyej. Di kiyaqa? A gago une kobotetgwajqa deqa. Onaqa Qotei na Yesus olo subq na tigeltoсиq gam dena iga tamo

bole une saiqoji qa mergej.

5

Qotei na iga tamo bole une saiqoji qa mergej

¹ Ariya iga Yesus qa gago areqalo singilatem deqa Qotei na iga tamo bole une saiqoji qa mergej. Gago Tamo Koba Yesus Kristus a jeu kobotej deqa iga Qotei ombla are qujaitosim unum.

² Yesus na gam waqtetgonaqa iga a qa gago areqalo singilatem. Bati deqa Qotei a iga qa are boleiyej. Qotei aqa kumbra di iga bini ojsim tigelejunum. Deqa iga Qotei na laj qureq joqsim oqsim dia iga a ombla sqajqa tarinjeqnum. Iga deqa tulaj areboleboleigeqnu.

³ Iga deqa segi areboleboleigosai. Iga gulbe eqnum deqa ti areboleboleigeqnu. Di kiyaqa? Iga qalieonum, gulbe dena iga singilatgeqnaqa iga singila na tigelejunum.

⁴ Iga singila na tigelejunum deqa iga gulbe di gotranjyeknamqa Qotei na iga nugoqnsiq iga qa tulaj areareteqnu. Gago kumbra dena iga Qotei na laj qureq joqsim oqwaqqa tarinjoqnsim unum.

⁵ Ariya iga laja tarinjosaieqnum. Qotei na aqa Mondor Bole iga egej deqa Mondor dena aqa qalaqlaiyo kumbra gago are miliqiq di atej unu.

⁶ Iga nami Qotei qoreiyo qaji tamo soqnem deqa iga gago segi jejamu aqaryaiyqa keresai. Iga degsi sonamqa Kristus a iga qa moiyej. Qotei a batil giltonaqa a iga qa moiyej.

⁷ Bole, iga mandam tamo unum deqa iga na tamo bole bei aqaryaiyqa osim a qa moiqasai.

Tamo tulañ boledamu bei soqnim a qa kiyo iga moiqom.

⁸ Ariya Kristus a iga bul sai. Iga une tamo sonamqa a iga qa moiyej. Aqa kumbra dena Qotei na iga osorgej, a iga tulanq qalaqlaigeqnu.

⁹ Kristus a moinaqa aqa leñ aiyej deqa Qotei a iga tamo bole une saiqoji qa mergej. Deqa iga bole qalieonum, mondonj Qotei a Kristus aqa wau dena iga torei elenqas. Amqa aqa minjinj oqwa batiamqa iga so bole sqom.

¹⁰ Iga Qotei ti jeu sonamqa aqa Niri a jeu kobotqa marsiq moiyej deqa bini iga Qotei ombla geregere unum. Deqa iga bole qalieonum, Yesus aqa ñambile na Qotei a iga torei elenqas.

¹¹ Anjam bei dego unu. Gago Tamò Koba Yesus Kristus aqa siñgila na iga Qotei ombla geregere unum deqa iga tulanq areboleboleigoqnqas.

Adam a moiyo qa utru, Yesus a ñambile qa utru

¹² Iga qalie, tamo qujai Adam a une atej. Aqa une dena tamo uñgasari kalil nañgi dego une elenjeb. Adam a une ti soqnej deqa a moiyej. Tamò uñgasari kalil nañgi dego une atoqnsib moreñoqneb.

¹³ Dal anjam a bosaisonqa tamo uñgasari kalil nañgi une atoqnsib laqneb. Dal anjam sosai deqa Qotei a nañgo une geregere ubtosaiqnej.

¹⁴ Adam a soqnej dena bosi bosiq Moses aqa batí qa tamo uñgasari kalil nañgi moreñoqneb. Bole, dal anjam qujai Adam na gotranjej qaji di tamo bei na gotranjosai. Adam a segi na gotranjej. Ariya moiyo na nañgi kalil ojesoqnej.

Adam a Kristus bunuqna bqas qaji a sigitej.

15 Niñgi quiy. Qotei a iga qa are boleiyosiq Yesus egej aqa kumbra de ti Adam aqa une ti ombla kerekere sai. Tamo qujai Adam a une atej deqa tamo ungasari gargekoba nañgi moreñeqneb. Ariya Qotei a olo tamo ungasari gargekoba nañgi qa are tulan boleiyosiq tamo qujai Yesus Kristus enrej. Qotei aqa kumbra dena Adam aqa kumbra tulan buñyejunu.

16 Qotei na iga Yesus egej aqa kumbra de ti Adam aqa une ti ombla kerekere sai. Adam a une qujai yej deqa Qotei na tamo ungasari nañgi peginjrsiqa nañgo jejamuq di une qametnjrej. Ariya tamo ungasari nañgi une gargekoba yoqneb deqa Qotei a olo nañgi qa are boleiyosiq Yesus enrej. Osiqa nañgi tamo bole une saiqoji qa minjrej.

17 Tamo qujai Adam a Qotei aqa dal anjam gotranjej deqa tamo ungasari kalil nañgi moreñeqnub. Ariya tamo qujai Yesus Kristus aqa wau na tamo ungasari Qotei a nañgi qa are boleiyeqnu qaji nañgi ñambile osib mandor kokba gaigai sqab. Tamo ungasari nañgi di Qotei na tamo bole une saiqoji qa minjreqnu. Qotei aqa kumbra dena Adam aqa kumbra tulan buñyejunu.

18 Deqa ningi quiy. Tamo qujai Adam a dal anjam gotranjej. Aqa kumbra dena Qotei na tamo ungasari kalil nañgi peginjroqnsiqa nañgo jejamuq di une qametnjreqnu. Dego kere tamo qujai Kristus a kumbra bole yej. Aqa kumbra dena Qotei a tamo ungasari kalil nañgi tamo bole une saiqoji qa minjroqnsiqa ñambile enjreqnu.

19 Tamo qujai Adam a Qotei aqa anjam gotranjej. Aqa kumbra dena tamo ungasari gargekoba nañgi dego une elenjeb. Dego kere

tamo qujai Kristus a Qotei aqa anjam dauryej. Aqa kumbra dena tamo uŋgasari gargekoba nangi tamo bole une saiqoji sqab.

²⁰ Dal anjam a bonaqa tamo uŋgasari naŋgo une kobaonaqa naŋgi dal anjam gotraŋyoqneb. Naŋgo une kobaej bati deqa Qotei a olo naŋgi qa are tulan boleiyej.

²¹ Une aqa kumbra na moiyo babbosiqa iga singila na taqatgesoqnej. Ariya bini Qotei a iga qa are tulan boleiyeqnu kumbra dena iga olo taqatgejunu. Gago Tamo Koba Yesus Kristus aqa wau na Qotei a iga qa are tulan boleiyooqnsiqa iga tamo bole une saiqoji qa mergeqnu. Kumbra dena iga ŋambile gaigai sqom.

6

Iga Kristus beteryosim a koba na moiybulem

¹ Ariya iga kiyersi marqom? Iga endegsi marqom kiyo, “Uŋgum, iga une gargekoba yoqnqom. Yim dena Qotei a iga qa are tulan boleiyooqnqas.” Iga degsi marqom kiyo?

² Sai bole sai. Iga moiyobulosim une aqa kumbra uratem. Deqa iga olo une yoqnqom e? Sai.

³ Iga Kristus Yesus beteryosim aqa ñam na yanso em. Kumbra dena iga a koba na moiybulem. Niŋgi di qaliesai kiyo?

⁴ Iga yanso osim dena iga Kristus beteryosim a koba na moiybulem. Deqa Abu na iga Kristus koba na subq atobulej. Osiqa aqa singila kobaqua na olo Kristus subq na tigeltej. Deqa iga degó a ti ŋambile bunuj osim kumbra bole dauryoqnnqom.

Iga Kristus beteryosim olo subq na tigelqom

5 Kristus a moiyej deqa iga a beteryosim a ti moiybulem. A olo subq na tigelej dego kere iga kamba a beteryosim olo subq na tigelqom.

6 Iga qalie, une aqa singila a gago jejamuq di waeqnu. Singila di koboqajqa deqa gago areqalo namij a Kristus ombla ḥamburbasq di moiyej. Deqa bini iga olo une aqa kaŋgal tamo bul sqasai.

7 Iga moiyo tamo bulem deqa une na iga olo ojqa keresai.

8 Od, iga Kristus ombla moiybulem deqa iga qalieonum, iga a ombla olo ḥambile sqom.

9 Iga qalie, Kristus a subq na tigelej deqa a olo bunu moiqa keresai. Moiyo na a olo taqatqa keresai.

10 A bati qujai qa moiyej. Aqa kumbra dena a na une aqa singila kobotej. Ariya bini a olo ḥambile unu di a Qotei ombla ḥambile unub.

11 Dego kere niŋgi endegsib are qaliy. Niŋgi moiybuleb deqa niŋgi olo une aqa kaŋgal tamo bul sosai. Niŋgi Kristus Yesus beteryosib Qotei ombla ḥambile unub.

12 Deqa une a nuŋgo jejamu taqatqa laqnimqa niŋgi na olo saidiyi. Niŋgi degyqab di niŋgi nuŋgo jejamu qa areqalo uge uge dauryoqnqasai. Nuŋgo jejamu agi bunuqna moiqas.

13 Une a nuŋgo siŋga ti baŋ ti taqatqa laqnimqa niŋgi na olo saidiyi. Niŋgi degyqab di niŋgi kumbra uge uge dauryoqnqasai. Niŋgi subq na olo tigelobulosib ḥambile unub deqa niŋgi nuŋgo segi jejamu ti baŋ ti siŋga ti Qotei yibqa a segi na taqatqas. Yim dena niŋgi kumbra bole dauryoqnqab.

14 Une na niŋgi olo taqatŋwasai. Di kiyaqa? Niŋgi dal anjam aqa sorgomq di sosai. Qotei a niŋgi qa are boleiyej kumbra di aqa sorgomq di niŋgi unub.

Iga kumbra bole aqa kaŋgal tamo bul unum

15 Od, iga olo dal anjam aqa sorgomq di sosai. Qotei a iga qa are boleiyej kumbra di aqa sorgomq di iga unum. Deqa iga kiyerqom? Iga une yoqn-qom e? Sai bole sai.

16 Niŋgi qalie, niŋgi nungo segi jejamu osib tamo bei yosib aqa anjam dauryoqnqab di niŋgi aqa kaŋgal tamo sqab. Dego kere niŋgi une dauryoqnqab di niŋgi une aqa kaŋgal tamo bul sqab. Osib niŋgi moreŋqab. Ariya niŋgi Qotei aqa kaŋgal tamo sosib aqa anjam dauryoqnqab di niŋgi tamo bole une saiqoji sqab. Di niŋgi qaliesai kiyo?

17 Bole, nami niŋgi une aqa kaŋgal tamo bul soqneb. Sonabqa bunuqna Qotei na niŋgi anjam bole merŋgonaq quisibqa nungo are miliq na dauryoqnqeb. Qotei a degyej deqa iga na a tulanŋ biŋjiyoqnqom.

18 Nuŋgo une na niŋgi tonto talq di breiŋgobulonaq sonabqa Qotei a dena niŋgi olo elenej. Deqa bini niŋgi kumbra bole aqa kaŋgal tamo bul unub.

19 O ijo was, e mandam tamo naŋgo kumbra qa niŋgi yawo anjam merŋgeqnum. Di kiyaqa? Niŋgi ijo anjam endi geregere poiŋgosai deqa. Nami niŋgi na nuŋgo siŋga ti baŋti naŋgi odnjreqnabqa naŋgi kumbra jiga ti kumbra uge ti naŋgo kaŋgal tamo bul sosibqa niŋgi kumbra ugeq breiŋgoqnqeb.

Ariya bini niŋgi na olo nuŋgo singa ti banj ti min-jribqa naŋgi kumbra bole aqa kaŋgal tamo bul soqnebe. Yim gam dena Qotei na niŋgi aqa segi kumbra boleq di atimqa niŋgi dauryoqnqab.

²⁰ Nami niŋgi une aqa kaŋgal tamo bul soqneb. Bati deqa niŋgi kumbra bole aqa kaŋgal tamo bul sosai.

²¹ Kumbra uge uge niŋgi nami yoqneb qaji dena niŋgi aqaryaingosaiqneb. Agi bini niŋgi kumbra deqa jemaingeqnu. Kumbra dena tamo naŋgi moiyo gam tureqnub.

²² Ariya nuŋgo une na niŋgi tonto talq di breiŋgobulonaq sonabqa Qotei a dena niŋgi olo eleŋej. Deqa bini niŋgi Qotei aqa segi kaŋgal tamo unub. Deqa niŋgi iŋgi boledamu oqab. Iŋgi boledamu agiende. Qotei na niŋgi aqa segi kumbra boleq di atimqa niŋgi dauryoqnqab. Osib niŋgi ŋambile gaigai sqab.

²³ Une na aqa kaŋgal tamo naŋgi awai enjreqnu. Awai agiende. Naŋgi moreneqnu. Ariya Qotei na iga iŋgi boledamu laŋa egeqnu. Iŋgi boledamu di agi iga ŋambile gaigai sqom. Ŋambile di iga gago Tamo Koba Yesus Kristus aqa wau na oqom.

7

Iga kumbra bunuj dauryoqnqom

¹ O ijo was, niŋgi dal anjam qalie unub deqa e na endegsi mernŋgwai. Niŋgi qalie, tamo a moiyoiso-qnimqa dal anjam na a taqatoqnqas. A moiymqa dal anjam na a olo taqatqasai.

² Deqa uŋa bei a tamo ti soqnimqa aqa tamo a moiyoisoqnim a tamo bei ombla sqa keresai. Dal anjam na getentejunu. Aqa tamo moiymqa

di a na olo tamo bei oqa kere. Dal anjam na getentosai.

³ Deqa aqa tamo soqnim a tamo bei ombla sqas di iga endegsi marqom, a sambala uña. Aqa tamo moiylimqa a na olo tamo bei oqa kere. Dal anjam na getentosai. Deqa a na tamo bei oqas di a sambala uña sqasai.

⁴ Deqa ijo was ningi quiy. Ningi Kristus aqa jejamu beteryosib a ombla moreneb deqa ningi olo dal anjam aqa sorgomq di sosai. Ningi tamo bei agi Kristus subq na tigelej qaji aqa segi tamo ungasari unub. Deqa iga kumbra bole bole Qotei a tulan areareteqnu qaji di yoqnqom.

⁵ Nami iga areqalo namij aqa kumbra daury-oqnem. Bati deqa dal anjam na gago banq di gago sin̄gaq di gago jejamuq di areqalo uge uge tigelte-qnaqa iga une atoqnem. Osim kumbra dena iga moiyo gam turoqnem.

⁶ Dal anjam na iga tonto talq di breigobulonaq soqnem. Ariya bini iga Kristus ombla moiybule-junum deqa iga olo dal anjam aqa kanjal tamo bul sosai. Iga Qotei waueteqnum. Iga dal anjam nami neñgrenyeb qaji deqa are qalsim Qotei wauetosaieqnum. Mondor na kumbra bunuj iga osorgej deqa iga Qotei waueteqnum.

Gago une na iga moiyatgej

⁷ E maronum, dal anjam a gago areqalo uge uge tigelteqnaqa iga une atoqnem. Deqa iga kiyersi marqom? Dal anjam a une tamo bulej e? Sai bole sai. Dal anjam na ijo une e osorbeqnu. Osorbosai qamu e une poibosai qamu. Dal anjam a marej, “Ni ino was aqa in̄gi in̄gi qa mamaulmaiq.” Degsi

marosai qamu mamaul kumbra di uge e degsi poibosai qamu.

⁸ Ariya dal anjam bej dena une a gam itosiqa ijo are miligiq di mamaul kumbra gargekoba babteleñeqnej. Dal anjam bosai qamu une a moiyo bulosiq uliejunu qamu.

⁹ Nami e Qotei aqa dal anjam qalieosaisosimqa bati deqa e ñambile soqnem. Ariya bunuqna Qotei aqa dal anjam ijoq bonaqa ijo une a ñambile so bulosiq tigelej.

¹⁰ Onaqa dena e moiymem. Dal anjam aqa wau utru agi tamo nangi ñambile enjrqajqa. Ariya e dal anjam dena ñambile osai. Dal anjam na e moiyatbej.

¹¹ Di kiyaqa? Dal anjam bej dena une a gam itosiqa e gisanjbej. Kumbra dena une na e moiyatbej.

¹² Deqa iga dal anjam qa kiyersi marqom? Iga endegsi marqom. Dal anjam a bole. A Qotei aqa segi dal anjam. A Qotei aqaq na bej. Dal anjam mutu kalil di Qotei aqa segi anjam. Anjam di bole tinjin kalil.

¹³ Deqa e kiyersi marqai? Dal anjam bole dena e lubsiq moiyatbej degsi marqai e? Sai bole sai. Une na e moiyatbej. Dal anjam bej dena une a gam itosiqa e moiyatbej. Dal anjam na une aqa kumbra boleq atnaqa iga unsim qalieem, bole, une a tulan ugedamu.

Gago une na iga taqatgejunu

¹⁴ Iga qalie, dal anjam a Qotei aqa Mondor aqaq na bej. Ariya e areqalo namijq di unum deqa une na e tonto talq di waibobulej unum.

15 Kumbra e yeqnum qaji di aqa utru e poibosai. Kumbra bole e yqajqa arearetbeqnu qaji di e olo yosaieqnum. Ariya kumbra uge e yqajqa arearetbosaeqnu qaji di e olo yeqnum.

16 Kumbra uge e yeqnum qaji di e yqajqa arearetbosaeqnu. Ijo kumbra dena ijo areqalo babteqnu. Ijo areqalo agiende, Qotei aqa dal anjam a bolequja.

17 Deqa e qalieonum, e segi na kumbra uge di yosaieqnum. Une ijo miliq di unu qaji a na kumbra uge di yobuleqnu.

18 E qalieonum, ijo miliq di inji bole bei sosai. E ijo areqalo namij qa maronum. Bole, e kumbra bole yqajqa arearetbeqnu. Ariya e kumbra bole di yosaieqnum.

19 Kumbra bole e yqajqa arearetbeqnu qaji di e yosaieqnum. Kumbra uge e yqajqa arearetbosaeqnu qaji di e olo yeqnum.

20 Kumbra uge e yqajqa arearetbosaeqnu qaji di e olo yeqnum deqa e qalieonum, e segi na kumbra uge di yosaieqnum. Une ijo miliq di unu qaji a na kumbra uge di yeqnu.

21 Deqa e kumbra endeqaji uneqnum. E kumbra bole yqajqa arearetbeqnaqa kumbra uge na olo gam getentetbeqnu.

22 Bole, ijo miliq di e Qotei aqa dal anjam qa tulanj arearetbeqnu.

23 Ariya e kumbra endeqaji uneqnum. Une a ijo banq di ijo singaq di ijo jejamuq di wauoqnsiqa Qotei aqa dal anjam ijo areqaloq di unu qaji di qoto iteqnu. Une di singila koba. Deqa a na e tonto talq di waibobuloqnsiqa ijo banj ti ijo singa ti ijo

jejamu ti di siŋgila na taqateqnu.

²⁴ Gulbe dena e tulan ugetbeqnu! Deqa tamo yai na aqaryaibimqa e ijo jejamu moiqas qaji endi olo uratqai?

²⁵ Od, e qalieonum. Gago Tamko Koba Yesus Kristus aqa wau na Qotei na aqaryaibimqa e ijo jejamu endi uratqai. Deqa e Qotei tulan binjyoqnsiy sqai. Bole, e ijo segi areqalo na Qotei aqa dal anjam dauryeqnum. Ariya e ijo areqalo namij na une aqa kumbra dauryeqnum.

8

Kristus a gago une kobotosiqa Qotei aqa Mondor Bole iga egej

¹ O ijo was kalil, iga Kristus Yesus beteryejunum deqa Qotei na gago jejamuq di olo une qametgwasi. Deqa iga awai uge oqasai.

² Nambile qa Mondor a Kristus Yesus aqa wau na niŋgi aqaryaingej deqa une ti moiyo ti na niŋgi olo taqatnqwa keresai.

³ Qotei na aqa segi Niri Yesus qariŋyonaqa a une tamo bulosiqa gago une kobotqa bonaqa aqa segi jejamuq di Qotei a gago une aqa awai uge atsiqa dena une aqa siŋgila kobotej. Iga gago areqalo namij na dal anjam dauryqa keresai deqa Qotei na iga degsi aqaryaigej.

⁴ Deqa bini iga gago jejamu qa areqalo namij na walwelosaieqnum. Iga Qotei aqa Mondor aqa kumbra na walweleqnum. Osim dena iga dal anjam aqa kumbra bole geregere dauryoqnsim kereteqnum.

⁵ Tamo naŋgi areqalo namij aqa kumbra na walweleqnub qaji naŋgi areqalo namij dauryeqnub. Ariya tamo naŋgi Mondor aqa kumbra na walweleqnub qaji naŋgi Mondor aqa areqalo dauryeqnub.

⁶ Tamo naŋgi areqalo namij dauryoqnqab di naŋgi morenqab. Ariya tamo naŋgi Mondor aqa areqalo dauryoqnqab di naŋgi lawo na ŋambile sqab.

⁷ Tamo naŋgi areqalo namij dauryeqnub qaji naŋgi Qotei ti jeu atoqnsib unub. Di kiyaqa? Naŋgi Qotei aqa dal anjam aqa sorgomq di sosai deqa. Naŋgi dal anjam dauryqa keresai bole sai.

⁸ Tamo naŋgi areqalo namij na walweleqnub qaji naŋgi kumbra Qotei a areareteqnu qaji di dauryqa keresai.

⁹ Ariya niŋgi areqalo namij aqa kumbra na walwelaieqnub. Qotei aqa Mondor a nungo are miliqiq di unu deqa niŋgi Mondor aqa kumbra na walweleqnub. Tamo a Kristus aqa Mondor ti sqasai di a Kristus aqa tamo sqa keresai.

¹⁰ Niŋgi une ti unub deqa nunŋo jejamu moiqas. Ariya Kristus a nunŋo are miliqiq di unu deqa niŋgi Qotei aqa ŋamgalaq di tamo bole une saiqoji unub. Deqa Mondor na niŋgi ŋambile eŋgas.

¹¹ Qotei na aqa Niri Kristus Yesus subq na tigeltej. Qotei aqa Mondor a nunŋo are miliqiq di unu deqa Qotei na nunŋo jejamu moiqas qají di degó subq na tigeltosim niŋgi ŋambile eŋgas. Di Mondor aqa siŋila na niŋgi ŋambile eŋgas.

Iga Qotei aqa aŋgro tiŋtiŋ unum

12 Deqa ijo was, iga areqalo namij aqa kumbra na walwelqasai.

13 Niŋgi areqalo namij aqa kumbra na walwelqab di niŋgi moreŋqab. Ariya niŋgi Mondor aqa singila na nuŋgo jejamu aqa kumbra moiyyotqab di niŋgi ɣambile sqab.

14 Tamo uŋgasari kalil Qotei aqa Mondor na gam osornjreqnaq walweleqnub qaji naŋgi Qotei aqa aŋgro tinqtiŋ unub.

15 Qotei na niŋgi laŋa kaŋgal tamo sqajqa marsiq aqa Mondor niŋgi eŋgosai. Niŋgi laŋa kaŋgal tamo sqab di niŋgi ulaqab. Qotei na niŋgi aqa segi aŋgro tinqtiŋ sqajqa marsiq aqa Mondor niŋgi eŋgej. Deqa niŋgi endegsib Qotei meteqnub, “O ni gago Abu.”

16 Mondor a segi gago are miliqiŋ di waueqnu deqa iga endegsi boleq di mareqnum, “Bole, iga Qotei aqa aŋgro unum.”

17 Iga Qotei aqa aŋgro unum deqa mondonj ingi bole bole Qotei a nami iga egwa marej qaji di egwas. Ingi di gago was Kristus a ejunu. Kristus a ingi di osaisosiqa jaqatiŋ qoboiyej. Deqa iga dego jaqatiŋ qoboiyoqnqom. Qoboiyosim mondonj iga a ombla ingi di osim so bole gaigai sqom.

Mondonj Qotei na iga so bole egwas

18 Mondonj Qotei na so bole di babtosim iga egwas. E are qalonum, so bole de ti jaqatiŋ iga bini eqnum qaji de ti ombla kerekere sai. So bole dena gago jaqatiŋ kalil tulaŋ buŋyesqas.

19 Mondonj Qotei na aqa segi aŋgro naŋgi babtelenqas. Naŋgi babtqajqa bati dí Qotei a nami atej. Ingi ingi kalil Qotei a gereiyelenej qaji naŋgi na bati di unqajqa deqa tarinjoqnsib ɣam

atoqnsib endegsib nenemeqnub, “Bati gembu bati di brantqas?”

²⁰ Bini ingi ingi kalil nañgi di ugeosib unub. Nañgo segi areqalo na nañgi ugeosai. Qotei a segi na nañgi ugetnjrej. Deqa kumbra bole bole Qotei na mondon nañgi enjrqas qaji deqa tarinjoqnsib unub.

²¹ Qotei na ingi ingi kalil di nañgi ugetnjrsiq tonto talq di breinjrobulej unub. Ariya mondon bati Qotei a nami atej qaji di brantimqa a na ingi ingi kalil di olo boletnjrimqa nañgi aqa angro nañgi ti koba na tulañ bole sqab.

²² Iga qalie, ingi ingi kalil Qotei a gereiyelenej qaji nañgi jaqatinj koba obuloqnsib akam ti unub. Nañgi nami jaqatinj oqneb agi bini oqnsib unub. Unja a angrötqa osiq jaqatinj eqnu dego kere.

²³ Ingi ingi kalil di nañgi segi akamosai. Iga Qotei aqa Mondor ejunum qaji iga dego jaqatinj oqnsim akamoqnsim unum. Qotei na aqa Mondor iga egej deqa iga qalieonum, a olo so tulanj boledamu dego iga egwas. Osim mondon a boleq di mergwas, “Ningi ijo angro kalil.” Iga bati di brantqajqa deqa tarinjoqnsim unum. Bati di brantimqa Qotei na gago jejamu bulyetgosim jejamu bunuj egwas.

²⁴ Qotei a iga elenej deqa bini iga jejamu bunuj di oqajqa tarinjoqnsim unum. Iga degyeqnum. Di kiyaqa? Iga jejamu bunuj di osaiunum deqa. Tamo bei a ingi bole bei oqas di a kiyaqa ingi deqa olo tarinjgas?

²⁵ Iga qalie, iga jejamu bunuj di osaiunum deqa iga mondon oqom. Deqa bini iga gulbe qoboiy-oqnsim tarinjoqnsim unum.

²⁶ Iga sinjila saiqoji unum deqa Qotei aqa Mon-

dor na iga aqaryaigeqnu. Iga iŋgi kiye qa pailyqajqa di iga geregere qaliesai. Iga pailyqajqa medabu gulbeigeqnaqa gago are miliq na akamoqnsim pailyeqnum. Deqa Mondor a segi na iga aqaryaigwa osiqa iga qa pailyeqnu.

²⁷ Qotei agi tamo naŋgo are miligi uneqnu qaji a Mondor aqa areqalo qalieeqnu. Deqa a na Mondor minjeqnaq quoqnsiq aqa segi tamo uŋgasari naŋgi qa pailyeqnu.

²⁸ Iga qalieonum, tamo kalil Qotei qalaqalaiyenub qaji naŋgi Qotei na geregereinjreqnu. A nami naŋgi elenqa osiq metnjrej deqa kumbra bei na naŋgi ugetnjqra keresai. Kumbra kalil naŋgoq di branteqnu qaji dena naŋgi olo boletnjreqnu.

²⁹ Tamо kalil Qotei a nami naŋgi qa qaliej qaji naŋgi di a na giltnjrej degо. Naŋgi aqa Niri Yesus a bulosib aqa segi kumbra bole dauryqajqa deqa osiq naŋgi giltnjrej. Gam dena Yesus a Qotei aqa aŋgro garkekoba naŋgo was matu sqas.

³⁰ Ariya tamо kalil Qotei na giltnjrej qaji naŋgi di a na metnjrej degо. Tamо kalil a na metnjrej qaji naŋgi di a na tamо bole une saiqoji qa minjrej degо. Tamо kalil a na tamо bole une saiqoji qa minjrej qaji naŋgi di a na aqa segi so bole enjrej degо.

Gulbe bei na Qotei aqa qalaqalaiyo kumbra getentqa keresai

³¹ O ijo was, Qotei na kumbra bole kalil di babteqnu deqa iga kiyersi marqom? Qotei na iga areigeqnu deqa tamо yai na iga olo jeutgwas? Tamо degо bei sosai.

32 Qotei na aqa segi Niri Yesus getentosai. A na Yesus qarinyonaq iga kalil qa bosiq moiyej. A na aqa segi Niri iga egej deqa iga qalieonum, a na ingi bole kalil dego iga egoqnqas.

33 Qotei na iga giltgej deqa tamo yai na gago jejamuq di olo une qametgwas? Tamo dego bei sosai. Qotei a segi na iga tamo bole une saiqoji qa mergej.

34 Deqa tamo yai na mergimqa iga gago une aqa awai uge olo oqom? Tamo dego bei sosai. Kristus Yesus a moisiq olo subq na tigelej. Deqa bini a Qotei aqa ban woq di awesosiqa iga qa Qotei pailyeqnu.

35 Kristus a segi na iga tulañ qalaqalaigeqnu. Deqa tamo yai na Kristus aqa qalaqalaiyo kumbra di olo getentimqa a na iga qalaqalaigwasai? Tamo dego bei sosai. O ijo was, iga gulbe osimqa kiyo, jaqatin osimqa kiyo, tamo qudei na iga ugeugeigibqqa kiyo, iga mam koba osimqa kiyo, gara saigimqa kiyo, kumbra uge bei na ugetgimqa kiyo, qoto bei gagoq di brantimqa kiyo Kristus a deqa iga qalaqalaigwasai e? Sai.

36 Bole, ingi uge uge di gagoq di brantoqnqab. Agi Qotei aqa anjam bei nami endegsib neñgreñyeb unu,

“O Qotei, iga ino segi tamo uñgasari unum
deqa bati gaigai jeu tamo nañgi na iga lugwoqnsib
moiyotgeqnub.

Nañgi iga kaja du du bul edegosib iga lugwajqa
laqnub.”

37 Kristus na iga qalaqalaigej deqa ingi uge uge kalil di gagoq di brantoqnqas di unjum. A

na gaigai iga singilatgeqnaqa iga qoto bunyoqnsim tigelejunum.

³⁸⁻³⁹ Od, Qotei na iga tulaj qalaqalaigeqnu. Deqa e endegsi ijo are singilatosim qalieonum, ingi bei na Qotei getentqa keresai. Yim a na iga qalaqalaigwasai. Moiyo ti njambile ti lanj angro naŋgi ti mondor singila naŋgi ti ingi ingi bini unub qaji naŋgi ti ingi ingi bunuqna brantelenqab qaji naŋgi ti ingi ingi singila ejunub qaji naŋgi ti ingi ingi lanj goge di unub qaji naŋgi ti ingi ingi mandam sorgomq di unub qaji naŋgi ti ingi ingi Qotei na gereiyelenej qaji naŋgi ti kalil dena Qotei getentqa keresai. Yim a na iga qalaqalaigwasai. Gago Tamo Koba Kristus Yesus aqa singila na Qotei na gaigai iga qalaqalaigoqnsim sqas.

9

Pol a Israel naŋgi qa are gulbeiyeqnej

¹ E Kristus aqa tamo unum deqa e ningi anjam bole merngeqnum. E gisan anjam merngosaeqnum. Mondor Bole na e areqalo ebeqnu deqa e qalieonum, ijo anjam endi bole.

² E gaigai are tulaj gulbeibeqnaqa are koba qaleqnum.

³ Osim endegsi pailyeqnum, “O Kristus, ni na e torei taqal waibosim ijo was agi Jekop aqa moma naŋgi olo kamba eleŋame.” E degsi pailyeqnum.

⁴ Ijo was naŋgi di Israel tamo unub. Qotei na naŋgi aqa segi angro qa giltnjrej. A na louqajqa kumbra ti aqa segi rianj ti aqa anjam nami singilatej qaji de ti aqa dal anjam ti naŋgi enjrej. Osicha minjrej, “Mondon e na ningi ingi bole bole enjgwi.”

⁵ Nañgo moma utru nañgi ñam koba ti soqneb. Nañgoq dena Kristus a ñambabej. Kristus a segi Qotei. A ingi ingi kalil nañgo gate. Deqa iga batí gaigai aqa ñam soqtoqnqom. Bole.

Qotei a Israel nañgoq di kumbra kiye yej?

⁶ Qotei a nami ijo was nañgi di ingi bole bole enjrqá marej. Ariya a na ingi di nañgi enjrosai. Deqa iga endegsi marqom kiyo, “Qotei aqa anjam ulonej”? Eo, iga degsi marqasai. Tamo kalil Israel nañgo leñ na ñambabeb qaji nañgi Israel tamo tiñtiñ sai.

⁷ Bole, nañgi Abraham aqa leñ na ñambabeb. Ariya nañgi kalil Abraham aqa añgro tiñtiñ sai. Qotei a nami Abraham minjej, “Ino añgro mel Aisak aqa leñ na qujai ino añgro tiñtiñ nañgi brantqab.”

⁸ Anjam di aqa utru agiende. Tamo nañgo ai abu na nañgi ñambabtnjqab dena nañgi Qotei aqa añgro tiñtiñ brantqasai. Tamo nañgi Qotei aqa anjam nami marej qaji di nañgo areqaloq di siñgilatqab dena qujai nañgi Abraham aqa añgro tiñtiñ brantqab.

⁹ Agi Qotei na Abraham anjam endegsi minjej, “Bati e nami atem qaji di brantimqa e olo inoq botqa ino ñauñ Sara a añgro mel oqas.”

¹⁰ Qotei aqa anjam bei dego unu. Rebeka a aqaratonaqa aqa añgro mel aiyel Eso Jekop wo nañgi ñambabeb. Nañgo abu agi gago moma utru Aisak.

¹¹⁻¹² Ariya Qotei na añgro mel qujai segi giltej. A añgro di aqa kumbra bole bei qa are qalsiq giltosai. A segi na metosiq giltej. Deqa iga

qalieonum, Qotei a gaigai aqa segi areqalo daury-oqnsiq tamo naŋgi giltnjreqnu. Deqa Rebeka aqa angro aiyel naŋgi di ɻambabosaisosib kumbra bole ti kumbra uge ti yosaisonabqa Qotei na Rebeka endegsi minjej, “Angrø namo ɻambabqas qaji a na angro bunu ɻambabqas qaji aqa sorgomq di sosim a kaŋgalyoqnnqas.”

¹³ Agi Qotei aqa anjam bei nami endegsib neŋgreŋyeb unu, “E Jekop qalaqlaiyeqnum. E Eso qalaqlaiyosaieqnum.”

¹⁴ Deqa iga kiyersi marqom? Qotei a kumbra uge yej degsi marqom e? Sai. Iga degsi marqasai bole sai.

¹⁵ Agi Qotei a nami Moses endegsi minjej, “E tamo bei qa are boleibqa marsiy are boleibqas. E tamo bei qa dulqajqa are soqnim dulqai.”

¹⁶ Deqa ijo was ningi quiy. Qotei a tamo bei giltqas di a aqa segi areqalo na tamo deqa dulosim giltqas. A na tamo di aqa kumbra bole ti aqa are bole ti deqa osim giltqasai.

¹⁷ Agi a nami Isip naŋgo mandor koba a qa dulqa uratosiqa endegsi minjej, “E ijo singila kobaquja ni osomitqa tamo uŋgasari kalil naŋgi unsib sawa sawa kalilq di ijo ñam mare mare laqnqab. Utru deqa e ni mandor koba atem.” Qotei aqa anjam di nami neŋgreŋyeb unu.

¹⁸ Deqa ijo was, iga endegsi qalieonum. Qotei a tamo bei qa dulqa are soqnim a tamo deqa dulqas. Ariya a tamo bei aqa areqalo getentqa are soqnim a getentqas.

¹⁹ Ariya ningi e endegsib merbqab, “Qotei a kumbra degyeqnu deqa a kiyaqa olo iga une ti qa mergeqnu? Qotei a gaigai aqa segi areqalo

dauryeqnu deqa tamo yai a Qotei aqa areqalo di olo uratqa kere? Tamo dego bei sosai.”

20 O tamo, ni tamo kiyero deqa ni Qotei degsi ñirintqam? Tamo bei a web gereiyim web na tigelosim endegsi minjcas kiyo, “Ni kiyaqa e degsi gereibonum?” A degsi minjqa keresai.

21 Web gereiyo tamo a aqa segi areqalo na mandam onjol aiyel osimqa web aiyel gereiyqas. Web bei tulan̄ boledamu gereiyqas. Di ingi goiça-jqa. Ariya web bei bolesai lan̄a wau qudei qa gereiyqas. Web gereiyo tamo a degyqas di a kumbra uge yqo e? Sai. A kumbra bole yqo.

22 Qotei a dego kumbra di yeqnu. Agi a na aqa minjin̄ boleq ateqnu. Di kiyaqa? Tamo un̄gasari nañgi aqa sin̄gila qalieqajqa deqa. Tamo un̄gasari Qotei a nañgi qa minjin̄ oqeteqnu qaji nañgi padalqa gamq di unub. Ariya a na nañgi urur padaln̄rosaieqnu. A nañgi qa tariñsokobaiyeqnu.

23 A degyeqnu. Di kiyaqa? Tamo un̄gasari a nañgi qa duleqnu qaji nañgi aqa so bole qalieqajqa deqa. Aqa so bole di tulan̄ boledamu. Nañgi aqa so bole di oqajqa deqa a na nami giltn̄rej.

24 Tamo un̄gasari Qotei a nañgi qa duleqnu qaji nañgi di agi iga. A na iga metgej. A Juda nañgo segiq dena iga metgosai. A sawa bei bei qaji nañgoq dena dego iga metgej.

25 Agi Hosea a nami Qotei aqa medabu osiqa anjam bei endegsi nengren̄jej, “Tamo nami ijo tamo sosai qaji nañgi di e na olo minjrqai, ‘Nin̄gi ijo segi tamo unub.’ Tamo nami e na qalaqalain-jrosaioqnem qaji nañgi di e na olo qalaqalainjrqai.

26 E nami sawa bei bei qaji nañgi endegsi min-

jrem, ‘Ningga ijo tamo sai.’ Ariya bunuqna e na nangi endegsi minjrqai, ‘Ningga ijo segi angro unub. Agi e Qotei nambile unum qaji.’”

²⁷ Aisaia a dego Qotei aqa medabu osiqa Israel nangi qa are qalsiq anjam endegsi marej, “Israel naingo moma nangi ulul bul tulanq gargekobaqab. Ariya naingo ambleq dena Qotei a tamo quja quja segi eleñqas.

²⁸ Od, Tamo Koba a na mandamq endi tamo ungasari nangi urur nolawotnjqras.”

²⁹ Aisaia a anjam bei dego endegsi marej, “Qotei singila koba tiunu qaji a na iga quja quja uratgonaq iga bole soqnem. A na iga padaltgosai. Padaltgej qamu iga Sodom ti Gomora ti bulosim kalil padalekritem qamu.”

Israel nangi Qotei qa naingo areqalo singilatosai

³⁰ Deqa iga kiyersi marqom? Iga endegsi marqom. Sawa bei bei qaji nangi tamo bole une saiqoji sqajqa gam namosaioqneb. Ariya nangi gam di iteb. Gam agiende. Nangi Yesus qa naingo areqalo singilateqnub gam dena nangi tamo bole une saiqoji unub.

³¹ Ariya Israel nangi Moses aqa dal anjam dauryqajqa waukobaoqneb. Nangi are qaloqneb, “Gam dena iga Qotei aqa njamgalaq di tamo bole une saiqoji sqom.” Ariya nangi dal anjam dauryqneb gam dena nangi tamo bole une saiqoji sosai.

³² Di kiyaqa? Nangi tamo bole une saiqoji sqajqa marsib Yesus qa naingo areqalo singilatqa urateb deqa. Nangi maroqneb, “Iga segi waukobaoism dena iga tamo bole une saiqoji sqom.” Nangi

degsib maroqnsib tal ai utru quraqyoqnsib manjaloqneb.

³³ Agi Qotei aqa anjam bei nami endegsib neñgreñye unu, “Nañgi quiy. E na tal ai utru bei osiy tal singilatqajqa deqa Saion qureq di tigeltit sqas. Tal ai utru di tamo nañgi quraqyosib manjaloqab. Ariya tamo nañgi tal ai utru deqa nañgo areqalo singilatqab di nañgi jemainjrqasai.”

10

Israel nañgi Qotei aqa kumbra qaliesai

¹ O ijo was, e Israel nañgi qa are koba qaloqnsim endegsi pailyeqnum, “O Qotei, ni na Israel nañgi eleñjame.”

² E qalieonum, Israel nañgi Qotei qa tulaj singilaeqnub. Ariya nañgi powo na degyosaieqnub.

³ Nañgi Qotei aqa ñamgalaq di tamo bole une saiqoji sqajqa gam qaliesai. Deqa nañgi nañgo segi singila na tamo bole une saiqoji sqajqa waueqnub. Nañgi Qotei aqa gam na tamo bole une saiqoji sqajqa urateqnub.

⁴ Iga qalie, Kristus a Moses aqa dal anjam kalil keretekritej. Deqa tamo uñgasari kalil Kristus qa nañgo areqalo singilateqnub qaji nañgi Qotei aqa ñamgalaq di tamo bole une saiqoji unub.

⁵ Israel nañgi tamo bole une saiqoji sqa marsibqa dal anjam dauryeqnub. Moses a nami nañgi qa osiqa anjam endegsi neñgreñyej, “Tamo a dal anjam mutu kalil torei dauryekritqas di a ñambile sqas.” Moses a anjam degsi neñgreñyej.

⁶ Ariya tamo nañgi Kristus qa nañgo areqalo singilateqnub qaji nañgi Qotei aqa ñamgalaq di tamo

bole une saiqoji unub. Deqa Moses a naŋgi qa osiqa anjam endegsi neŋgreŋyej, “Niŋgi nunŋo segi are miliqiŋ na endegsib maraib, ‘Yai a laŋ qureq oqsim Kristus osim mandamq osi aiqas?’ ”

⁷ Moses a olo anjam bei dego endegsi neŋgreŋyej, “Niŋgi endegsib maraib, ‘Yai a moiyo qureq aisim Kristus olo subq na tigeltqas?’ ”

⁸ Anjam di aqa utru agiende, “Qotei aqa anjam a jojom di unu. A isaq di sosai. A nunŋo medabuq di unu. A nunŋo are miliqiŋ di dego unu.” O ijo was, tamo naŋgo areqalo Yesus qa siŋgilatqajqa anjam di agi iga mare mare laqnum.

⁹ Deqa niŋgi nunŋo medabu waqtosib Yesus a segi qujai Tamo Koba unu degsib boleq di mariy. Osib Qotei a Yesus subq na olo tigeltej anjam di nunŋo are miliqiŋ di siŋgilatiy. Niŋgi degyqab di Qotei na niŋgi elenqas.

¹⁰ Gago are miliqiŋ na iga Yesus qa gago areqalo siŋilateqnum deqa Qotei na iga tamo bole une saiqoji qa mergeqnu. Gago medabu na iga Yesus aqa ñam soqtoqnsim boleq di mareqnum deqa Qotei na iga elenqas.

¹¹ Agi Qotei aqa anjam bei nami endegsib neŋgreŋyeb unu, “Tamo naŋgi Kristus qa naŋgo areqalo siŋgilatqab di naŋgi jemainjrqasai.”

¹² Od, iga Juda ti Grik ti kalil kerekere unum. Kristus a gago kalil qa Tamo Koba. Deqa a na tamo kalil a metoqnsib pailyeqnub qaji naŋgi tulan geregereinjreqnu.

¹³ Agi Qotei aqa anjam bei endegsi unu, “Tamo kalil Tamo Koba aqa ñam metoqnsib pailyeqnub qaji naŋgi a na elenqas.”

14 Ariya tamo naŋgi Kristus qa naŋgo areqalo singilatqasai di naŋgi kiyersib a metosib pailyqab? Naŋgi aqa anjam quqwasai di naŋgi kiyersib a qa naŋgo areqalo singilatqab? Anjam palonto tamo naŋgi Kristus aqa anjam palontqasai di tamo naŋgi kiyersib aqa anjam quqwasab?

15 Kristus na anjam palonto tamo naŋgi qariŋnjqasai di naŋgi kiyersib aqa anjam palontqab? Di keresai kalil. Ariya anjam palonto tamo naŋgi agi beqnub. Qotei aqa anjam bei nami endegsib neŋgrenyeb unu, “Anjam palonto tamo naŋgi anjam bole osi beqnabqa tamo uŋgasari naŋgi tulan̄ areboleboleinjreqnu.”

Israel naŋgi Qotei aqa anjam bole dauryosiaeqnu

16 Tamо uŋgasari kalil naŋgi Kristus aqa anjam bole di dauryeqnub e? Sai. Agi Aisaia a nami endegsi marej, “O Tamо Koba, tamо quoja quoja segi gago anjam naŋgo areqaloq di siŋgilateqnub.”

17 Deqa ijo was, iga qalieonum, iga gago dabkala na Qotei aqa anjam quqwom gam dena iga gago areqaloq di siŋgilatqom. Anjam iga queqnum qaji di agi Kristus aqa medabuq na branteqnu.

18 Ariya e ningi endegsi nenemŋgawai. Israel naŋgi Kristus aqa anjam bole di nami quosai kiyo? Sai. Nanji quoqneb. Agi neŋgren endegsi unu, “Qotei aqa anjam di gilsiq sawa sawa kalil keretonaqa tamо uŋgasari kalil naŋgi quoqneb.”

19 Deqa e ningi olo nenemŋgawai. Israel naŋgi anjam di aqa utru poinjrosai kiyo? Sai. Nanji poinjrej. Agi Moses a nami Qotei aqa anjam bei endegsi marej, “Sawa bei bei qaji naŋgi ñam

saiqoji unub. Naŋgi tamo bolesai. Naŋgi e qa qaliesai dego. Ariya e na naŋgi eleŋqai. Osiy ijo kumbra dena e na Israel naŋgo are ugetetnjrit naŋgi ɻiriŋqab.”

²⁰ Aisaia a dego nami sawa bei bei qaji naŋgi qa osiq Qotei aqa anjam endegsi singila na marej, “Tamo naŋgi e qa ɻamosaioqneb qaji naŋgi e it-beb. Tamо naŋgi e qa marosaioqneb qaji naŋgi e nubeb.”

²¹ Ariya Aisaia a olo Qotei aqa medabu osiqa Israel naŋgi qa endegsi marej, “E batı gaigai naŋgi qa tariŋoqnsim metnjreqnam naŋgi olo diqoqnsib ijo anjam gotraŋyeqnub.”

11

Qotei a tamo quja quja segi eleŋoqnsiq olo gargekoba uratnjreqnu

¹ Deqa e ningi endegsi nenemŋgwi. Qotei na aqa segi tamo uŋgasari agi Israel naŋgi qoreinjrej e? Sai. E dego Israel tamo. E Abraham aqa moma. E Benjamin aqa lej na ɻambabem.

² Qotei na Israel naŋgi qoreinjrosai. Naŋgi aqa segi tamo uŋgasari unub. A nami naŋgi qa qalieosiq giltnjrej. Agi Elaija aqa anjam bei nengrenq di unu. Aqa anjam di ningi qaliesai kiyo? Elaija a Israel naŋgo kumbra uge qa are qalsiq endegsi Qotei pailyej,

³ “O Tamо Koba, naŋgi na ino medabu o qaji tamo naŋgi ɻumeleŋoqnsib ino atra bijal niňaŋyeqnub. E segi qujai ni daurmeeqnum deqa naŋgi na e lubqa laqnub.” Elaija a Qotei degsi pailyej.

⁴ Onaqa Qotei na kamba Elaija kiyersi minjej? A endegsi minjej, “Ni segi e daurbosai. Ijo tamo 7,000 naŋgi dego e daurbeqnub. Naŋgi siŋga pulutosib gisan qotei Bal a qa louosaieqnub.” Qotei na Elaija degsi minjej.

⁵ Dego kere bini Qotei a Israel tamo quja quja segi eleŋoqnsiq olo gargekoba uratnjreqnu. Tamo naŋgi a na eleŋeqnu qaji di a naŋgi qa are boleiyonaq giltnjrej.

⁶ A naŋgo wau bole bei qa are qalsiq naŋgi giltnjrosai. Naŋgi wau bole yonab a deqa are qalsiq naŋgi giltnjrej qamu a naŋgi qa are boleiyej aqa kumbra di laŋa uloŋej qamu.

⁷ Deqa iga kiyersi marqom? Iga endegsi marqom. Israel naŋgi tamo bole une saiqoji sqajqa waueqnab ugeinjroqnej. Ariya Qotei na Israel naŋgi qudei aqa segi qa marsiq giltnjrej. Deqa naŋgi aqa ŋamgalaq di tamo bole une saiqoji unub. Israel naŋgi gargekoba Qotei na olo areqalo getentnjroqnej.

⁸ Naŋgi qa anjam bei nami endegsib neŋgreŋyeb unu, “Qotei na naŋgi nanaritnjsiqa naŋgo ŋamdamu ti dabkala ti torei getentnjrej. Naŋgi nami degsib soqneb bosiq agi bini degsib unub.”

⁹ Devit a dego naŋgi qa osiqa endegsi marej, “Naŋgi iŋgi uyqa korooqnbqqa gulbe gargekoba naŋgoq di brantqnsim kakaj bul naŋgi kabutnjroqncas.

Osim sil bul naŋgo kakro qainyetenjrsim naŋgi uneq breinjrim naŋgo siŋga meniŋq di tanjosib ululojosib awai ugedamu oqnqab.

¹⁰ Naŋgo ŋamdamu dego getenjrim sawa unqajqa keresaiinjrim sqab.

Soqniib Qotei na naŋgo qore tanu pulutetnjrim naŋgi tingiqqa keresai. Naŋgi gaigai degsib sqab.”

Qotei na sawa bei bei qaji naŋgi olo eleŋeqnu

11 Deqa ijo was, e ningi endegsi nenemŋgwai. Israel naŋgi ululonjeb deqa naŋgi torei padalqab e? Sai bole sai. Israel naŋgi Qotei qoreiyeb deqa Qotei a olo sawa bei bei qaji naŋgi eleŋeqnu. Israel naŋgi Qotei aqa kumbra di unsibqa are ugeinjrim aqaq olo bqajqa deqa are qalsiq sawa bei bei qaji naŋgi eleŋeqnu.

12 Israel naŋgi Qotei qoreiyeb gam dena Qotei na olo tamo uŋgasari mandamq endi unub qaji naŋgi so bole enjreqnu. Od, Israel naŋgi Qotei aqa anjam urateb gam dena Qotei na olo sawa bei bei qaji naŋgi so bole enjreqnu. Deqa iga bole qalieonum, mondoŋ Israel naŋgi olo puluosib Qotei aqaq babqa gam dena Qotei na naŋgi ti sawa bei bei qaji kalil naŋgi ti so tulaŋ boledamu enjrqas.

13 O sawa bei bei qaji niŋgi e na anjam endegsi merŋgit quiy. Qotei na e qarinbej deqa e nuŋgo ambleq di waueqnum. E ijo wau deqa tulaŋ areboleboleibeŋqnu.

14 Ijo are koba endegsi unu. E na ijo was Israel naŋgo areqalo tigelteŋnjritqa kumbra bole bole Qotei a ningi engeqnu qaji di naŋgi dego oqajqa maribqa Qotei na naŋgi qudei eleŋqas.

15 Qotei na Israel naŋgi walinqrej gam dena a na olo tamo uŋgasari gargekoba mandamq endi unub qaji naŋgi eleŋosiq jeu kobotej. Deqa iga bole qalieonum, Qotei na Israel naŋgi eleŋqas gam dena

a na tamo uŋgasari gargekoba naŋgi olo subq na tigeltnjrqas.

16 Iga bem sum oqnsim dena bem gereiyoqnsim potoqnsim taqal bei Qotei atraiyeqnum. Deqa bem kalil dego Qotei aqa segi bem. Nam aqa jirim di Qotei aqa segi jirim. Deqa ŋam aqa dani di dego Qotei aqa segi dani.

17 Israel naŋgi ŋam oliv qure qaji aqa dani bul unub. Dani qudei Qotei na giŋgeŋnrsiqa breinjrej. Ariya ningi sawa bei bei qaji unub deqa ningi naňu qaji oliv aqa dani bul unub. Dani di Qotei na olo eleŋosiqa ŋam oliv qure qaji aqa qoboq di betertrnjrej unub. Dani di agi ningi segi. Dani Qotei na giŋgeŋnrsiq breinjrej qaji naŋgo sawa di agi ningi na olo eb. Deqa bini ningi ŋam oliv qure qaji aqa dani naŋgi ti namur bole oqnsib unub.

18 Deqa ningi diqosib endegsib are qalaib, “Iga na ŋam oliv qure qaji aqa dani qudei naŋgi buŋnjreqnum.” Ningi diqwab di ningi mati endegsib are qaliy. Nam oliv aqa jirim a na ningi namur eŋgeqnu. Ningi na jirim di namur yosaieqnub.

19 Ariya ningi na kamba e endegsib merbqab, “Qotei na dani qudei giŋgeŋnrsiq naŋgi breinjrsiqa olo iga osiqa naŋgo limeq di iga betertgej unum.”

20 Nuŋgo anjam di bole. Ariya Qotei aqa kumbra di aqa utru agiende. Israel naŋgi Qotei qa naŋgo areqalo siŋgilatosai deqa Qotei na naŋgi giŋgeŋnrsiqa breinjrej. Ariya ningi Qotei qa nuŋgo areqalo siŋgilateqnub deqa Qotei na ningi olo eleŋej. Di nuŋgo segi wau bole bei na sai. Deqa ningi nuŋgo segi ŋam soqtaib. Ningi ulaoiy.

²¹ Niñgi are qaliy. Nam oliv qure qaji aqa dani di Qotei na giñgeñjrsiq breinjrej. Deqa ningi nuñgo segi ñam soqtosib diqwab di a na niñgi dego giñgeñgosim breinjwas.

²² Niñgi geregere are qaliy. Qotei na tamo qudei nañgi kumbra bole enjreqnu. Osiqa olo tamo qudei nañgi gulbe enjreqnu. Tamo nañgi Qotei qoreiyosib uloñeb qaji nañgi di a na gulbe enjreqnu. Ariya niñgi Qotei aqa kumbra bole geregere ojqab di a na kumbra bole di niñgi engoqnqas. Saiqas di a na niñgi dego giñgeñgosim breinjwas.

²³ Dani qudei nañgi nami ñam oliv qure qaji di sonab Qotei na nañgi giñgeñjrsiq breinjrej. Ariya nañgi are bulyosib Qotei qa nañgo areqalo singilatqab di a na nañgi olo joqsim ñam oliv qoboq di betertnjrqas. Od, Qotei na nañgi olo betertnjrqa kere.

²⁴ Niñgi qalie, nami niñgi nañu qaji oliv aqa dani soqneb. Sonabqa Qotei na niñgi dena giñgeñgosiq joqsi bosiq ñam oliv qure qaji aqa qoboq di betertngej. Nam oliv qure qaji di nuñgo ñam utru tintinj sai. Deqa iga bole qalieonum, bunuqna Qotei na ñam oliv qure qaji aqa segi dani nañgi olo joqsim bosim nañgo segi limeq di betertnjrqas.

*Qotei a tamo uñgasari kalil nañgi qa
are boleiyosim eleñqajqa are koba unu*

²⁵ O ijo was kalil, niñgi diqoqnsib endegsib maraib, “Iga powo koba ti unum.” Niñgi degaib. E uli anjam bei merñgawai. Israel gargekoba nañgo areqalo geteñjrejunu. Nañgi degsib soqni sawa bei bei qaji tamo uñgasari Qotei na nami giltnjrej

naŋgi di kalil elenekritosim kereamqa bati deqa a na Israel naŋgo areqalo olo waqtetnjrqas.

26 Gam dena Qotei na Israel kalil naŋgi elenqas. Agi Qotei aqa anjam bei nami endegsib neŋgreŋyeb unu, “Aqaryaingo Tamo Koba a Jerusalem dena tigelosim bosim Jekop aqa moma kalil naŋgi are bulyetnjrim naŋgi ijo anjam gotraŋyqajqa kumbra di olo uratqab.

27 Yimqa bati deqa e naŋgi koba na anjam qosisiy dena naŋgo une kalil kobotetnjrqai.” Qotei aqa anjam nami degsib neŋgreŋyeb.

28 Israel naŋgi Yesus aqa anjam bole qoreiye-qnub deqa naŋgi Qotei ti jeu atoqnsib unub. Deqa Qotei na naŋgi kamba uratnjroqnsiq olo ningi sawa bei bei qaji tamo uŋgasari eleneqnu. Nami Qotei na Israel naŋgi giltnjrsiqa qalaqlainjrej. A naŋgo moma utru naŋgi qa are qalsiq kumbra degyej.

29 Iga qalie, Qotei a tamo uŋgasari naŋgi met-njrsim ingi bole bole enjrqas di a bunuqna aqa kumbra di olo uratqa keresai.

30 O sawa bei bei qaji ningi nami Qotei aqa anjam gotraŋyoqneb. Ariya bini Israel naŋgi kamba Qotei aqa anjam gotraŋyeqnb. Gam dena Qotei a olo ningi qa duleqnu.

31 Od, Israel naŋgi Qotei aqa anjam gotraŋyeqnb deqa Qotei a ningi qa duleqnu. Gam dena bunuqna Qotei a Israel naŋgi qa kamba dego olo dulqas.

32 Qotei na iga kalil aqa anjam gotraŋyqajqa kumbraq di breigonaqa iga tonto talq di sobulem. Qotei a degyej. Di kiyaqa? A iga kalil qa olo

dulqajqa deqa.

Iga Qotei aqa ñam soqtoqnqom

³³ O ijo was, Qotei aqa areqalo ti powo ti kalil tulañ bolequja. Di tulañ guma koba dego. Deqa iga na Qotei aqa areqalo ti powo ti di aqa utru geregere ubtosim marqa kerasai. Aqa kumbra kalil dego iga dauryosim itqa kerasai.

³⁴ Agi Qotei aqa anjam bei nami endegsib nengreñyeb unu, “Tamo yai a Qotei aqa areqalo qalieqa kere? Osim a gam osoryqa kere?

³⁵ Tamo yai na Qotei ingi bei yqas? Yosim Qotei na kamba olo yqajqa minjgas? Tamo dego bei sosai.”

³⁶ O ijo was ningi quiy. Qotei a ingi ingi kalil atelenjej. A ingi ingi kalil qa utru. Ingi ingi kalil di aqa segi. Deqa iga bati gaigai aqa ñam soqtoqnqom. Bole.

12

Ninji nunjgo jejamu osib Qotei atraiiyiy

¹ O ijo was kalil, Qotei a iga qa dulej deqa e ningi singila na endegsi mern̄gawai. Ningi nunjgo segi jejamu ñambile unu qaji di osib Qotei atraiiyiy. Ningi Qotei aqa segi tamo ungasari bole unub deqa ningi kumbra Qotei a tulaj areareteqnu qaji di yoqnij. Ningi degyqab di ningi Qotei qa bole louoqnqab.

² Ningi mandam tamo nañgo kumbra dauryosib walwelaib. Qotei a areqalo bunuj engimqa ningi tamo bunuj sosib dena ningi Qotei aqa areqalo geregere qalieoiy. Qotei aqa areqalo agiende. Ningi kumbra bole ti kumbra Qotei a tulaj

areareteqnu qaji de ti kumbra tulañ bolequja de ti keretosib dauryoqniy.

Wau segi segi Qotei na niñgi engej qaji di yoqniy

³ Qotei a e qa are boleiyonaq wau ebej deqa e niñgi segi segi endegsi merñgwai. Niñgi nuñgo segi ñam soqtaib. Osib nuñgo was qudei nañgi buñnjrqa are qalaib. Niñgi areqalo bole ti sosib nuñgo kumbra geregere tenemtoqniy. Qotei na niñgi segi segi singila engej deqa niñgi singila di osib Qotei qa nuñgo areqalo singilatosib waquoqniy.

⁴ Niñgi qalie, iga kalil jejamu qujai. Gago jejamu miliqiq di bañ ti siñga ti ñamdamu ti dabkala ti unub. Nañgi kalil wau qujai yosaieqnub. Nañgi wau segi segi yeqnub.

⁵ Dego kere iga tamо ungasari gargekoba unum. Iga kalil Kristen aqa jejamu qujai. Deqa iga segi segi kalil jejamu qujaiq di turtejunum.

⁶ Qotei a iga qa are boleiyonaq singila segi segi egej. A na tamо qudei nañgi singila enjrej deqa nañgi a qa nañgo areqalo singilatoqnsib aqa medabu osib anjam palontoqnebe.

⁷ A na tamо qudei nañgi singila enjrej deqa nañgi nañgo Kristen was nañgi aqaryainjroqnebe. A na tamо qudei nañgi singila enjrej deqa nañgi aqa anjam plaltoqnebe.

⁸ A na tamо qudei nañgi singila enjrej deqa nañgi nañgo Kristen was nañgi singilatnjroqnebe. A na tamо qudei nañgi singila enjrej deqa nañgi silali ingi ingi jeiyoqnsib tamо ungasari ingi qa truqueqnub qaji nañgi enjroqnebe. A na tamо qudei nañgi singila enjrej deqa nañgi aqa wau geregere taqatoqnebe. A na tamо qudei nañgi singila enjrej

deqa naŋgi arebolebole na tamo uŋgasari naŋgi qa duloqnebe.

Niŋgi na nuŋgo Kristen was naŋgi bole qalaqalainjroqniy

⁹ O ijo was niŋgi na tamo uŋgasari naŋgi bole qalaqalainjroqniy. Niŋgi gisaŋ na naŋgi qalaqalainjraib. Niŋgi kumbra uge kalil torei uratekritisib kumbra bole segi beteryosib yoqniy.

¹⁰ Niŋgi gaigai Qotei aqa segi tamo uŋgasari naŋgi nuŋgo was tiŋtiŋ edegosib naŋgi qalaqalainjroqniy. Niŋgi nuŋgo segi ñiam tentoqnsib Kristen was naŋgo ñam olo soqtoqniy.

¹¹ Niŋgi gaigai siŋgila na Qotei aqa wau ojogniy. Qotei aqa Mondor a nungoq aiyoqnsim are tigelteŋgoqnim niŋgi Tamo Koba aqa wau ojqajqa tulan̄ siŋgilaqniy.

¹² Mondoŋ Qotei na niŋgi laŋ qureq osi oqwas. Niŋgi deq oqwaŋqa tarinjoqnsib areboleboleinjgoqneme. Osib gulbe nuŋgoq boqnimqa niŋgi siŋgila na tigeloqnsib qoboiyoqniy. Osib gaigai Qotei pailyoqniy.

¹³ Qotei aqa segi tamo uŋgasari qudei naŋgi ingi ingi qa truquoqniqbqa niŋgi na naŋgi aqaryainjroqniy. Tamo laŋaj naŋgi dego nuŋgo meq boqniqbqa naŋgi oqnsib geregereinjroqniy.

¹⁴ Tamo qudei na niŋgi ugeugeingibqa di uŋgum, niŋgi kamba olo Qotei na naŋgi aqaryainjrqqa marsib pailyoqniy. Qotei na naŋgi ugetnjqajqa deqa pailyaib.

¹⁵ Kristen was qudei naŋgi areboleboleinjrimqa niŋgi naŋgi koba na areboleboleinjgeme. Kristen

was qudei naŋgi akamoqnibqa niŋgi naŋgi koba na akamoiy.

16 Niŋgi segi segi kalil areqalo qujaitosib soqniy. Niŋgi nungo segi ñam soqtqa are qalaib. Niŋgi tamo ñam saiqoji naŋgi koba na laqniy. Niŋgi diqoqnsib endegsib maraib, “Iga powo koba ti unum.” Niŋgi degaib.

17 Tamo qudei na niŋgi kumbra uge engibqa niŋgi na kamba naŋgi kumbra uge enjraib. Niŋgi tamo kalil naŋgo ɻamgalaq di kumbra bole segi yoqniy.

18 Niŋgi ɻiriŋ ti qoto ti uratiy. Gam soqnimqa niŋgi gaigai tamo ungasari kalil naŋgi koba na are qujaitosib lawo na soqniy.

19 O ijo was bole, tamo qudei na niŋgi gulbe engibqa niŋgi na kamba naŋgi gulbe enjraib. Uratosib naŋgi Qotei aqa banq di atibqa a segi naŋgi qa ɻiriŋosim gulbe enjrqas. Agi Tamo Koba aqa anjam bei nami endegsib neŋgreŋyeb unu, “Une kambatqajqa wau di ijo segi wau. E segi na tamo naŋgo une qa naŋgi kambatnjqrai.

20 Deqa ino jeu tamo bei a mamyimqa ni a gereiyosim iŋgi anaiye. A ya qaryimqa dego gereiyosim ya anaiye. Ni a degyimqa a aqa kumbra uge qa are qalsim jemaiyqas.”

21 O ijo was, Qotei aqa anjam degsi unu deqa e niŋgi segi segi endegsi merŋgwai. Kumbra uge bei na ni ojqa laqnim ni segi siŋgilaosim kumbra bole dauryosim dena ni kumbra uge buŋyosim gotranjyqam.

13

Niŋgi sawa taqato qaji mandor naŋgo sorgomq di

soqniy

¹ Niñgi kalil sawa taqato qaji mandor nañgo sorgomq di geregere soqniy. Iga qalie, mandor nañgi laña wauosai. Qotei a segi na nañgi wau enjreqnaqa nañgi sawa taqateqnub. Qotei a segi na nañgi ateleñej unub.

² Deqa tamo nañgi mandor nañgo anjam go-tranjqab di nañgi Qotei aqa anjam dego go-tranqyonub. Tamo nañgi degyqab di nañgi awai uge oqab.

³ Mandor nañgi wau ojeqnub di tamo kumbra uge uge yeqnub qaji nañgi ula enjrqajqa deqa waueqnub. Mandor nañgi na tamo kumbra bole bole yeqnub qaji nañgi ula enjrqajqa deqa wauosai. Deqa ningi kumbra bole bole yoqniy. Ningi degyqab di ningi mandor nañgi qa ulaqasai. Nañgi na nuñgo ñam soqtetñgwab.

⁴ Mandor nañgi Qotei aqa wau tamo bul unub. Nañgo wau qujai agi nañgi na ningi aqaryainqoqnsib geregereinjgeqnub. Ariya ningi kumbra uge uge yoqnqab di ningi nañgi qa ulaqab. Ningi qalie, mandor nañgi sebru ojejunub. Nañgi sebru laña ojosai. Nañgi Qotei aqa wau tamo bul unub deqa nañgi sebru dena tamo uñgasari kumbra uge uge yeqnub qaji nañgi awai uge enjreqnub.

⁵ Deqa iga mandor nañgo sorgomq di geregere sqom. Iga awai uge oqa uratosim deqa nañgo anjam dauryqom. Deqa segi sai. Iga gago are miliqiq di qalieonum, kumbra di bole. Osim deqa ti iga mandor nañgo anjam dauryqom.

⁶ Utru deqa ningi takis waiyeqnub. Mandor

naŋgi Qotei aqa wau tamo bul unub deqa naŋgi gaigai sin̄gila na wau taqateqnub.

⁷ Deqa niŋgi na mandor naŋgo in̄gi in̄gi olo en̄jroqniy. Osib takis o qaji tamo naŋgo banq di takis atoqniy. Od, niŋgi tamo kokba kalil naŋgo sorgomq di geregere sosibqa naŋgo anjam quoqnsib kumbra bole bole osornjroqniy. Osib naŋgo ñam soqtoqniy.

Niŋgi qalaqalaiyo kumbra dauryoqniy

⁸ Niŋgi was bei aqa in̄gi in̄gi qudei ejunub di nuŋgoq di sokobaiyaiq. A qa kamba olo yiy. Ariya kumbra bole bei nuŋgoq di gaigai soqneme. Kumbra agiende. Niŋgi segi segi qa qalaqalaiyo kumbra yoqniy. Tamo a qalaqalaiyo kumbra dauryqas di a dal anjam kalil dego keretosim dauryekritqas.

⁹ Iga qalie, dal anjam a endegsi marqo, “Niŋgi tamo bei qalsib moiyyotaib. Niŋgi bajin̄aib. Niŋgi was bei aqa in̄gi in̄gi qa mamaulŋgaiq. Niŋgi was bei aqa unja jejamu ojetaib.” Anjam bei dego unu. Anjam agiende, “Ni ino segi jejamu gereiyeqnum dego kere ni ino was naŋgi degsim geregereinjrqne.” O ijo was, anjam qujai dena dal anjam kalil kabutejunu.

¹⁰ Tamo bei na tamo bei qalaqalaiyqas di a na tamo di kumbra uge bei yqa kerasai. Deqa a qalaqalaiyo kumbra dauryqas di a dal anjam kalil dego keretosim dauryekritqas.

Niŋgi kumbra bole dauryosib walweloqniy

¹¹ Niŋgi kumbra degyoqniy. Bati iga bini unum qaji endi niŋgi qalie. Niŋgi ñeio qa kumbra uratosib tigelqajqa bati agi brantqo. Niŋgi qalie, Qotei na iga elenqajqa bati isaq yala sonaqa iga

Kristus qa gago areqalo siŋgilatem. Ariya bini Qotei na iga eleŋqajqa batı jojomqo.

¹² Qolo koboeqnaqa sawa suwanjqa laqnu. Deqa iga ambru qaji kumbra kalil uratosim suwanj qaji kumbraq di sosim qoto qa gara bul jugwom.

¹³ Tamo a qanam walweleqnu dego kere iga kumbra bole tiŋtiŋ na walweloqnqom. Deqa iga diqoqnsim alanjkobaoqnsim ya uge uyoqnsim nenarioqnqasai. Iga sambala kumbra dego yoqnqajqa are pruggoqnim kumbra uge jigat yoqnqasai. Iga laŋa laŋa ŋirijoqnsim tamo qudei naŋgi qa are ugeigoqnqasai.

¹⁴ Niŋgi Tamo Koba Yesus Kristus beteryosib a gara bul jigsib soqniy. Sosib deqa niŋgi nuŋgo segi jejamu qa areqalo namij dauryoqnaib.

14

Niŋgi nuŋgo Kristen was naŋgi peginjraib

¹ Tamo ungasari qudei Yesus qa naŋgo areqalo siŋgilateqnub qaji naŋgo areqalo di kiňala siŋgilaosai unu. Deqa niŋgi naŋgo kumbra pegiyosib uge qa minjraib. Osib naŋgi koba na anjam na qotaib. Niŋgi naŋgi osib gereinjriy.

² Naŋgo areqalo kiňala siŋgilaosai unu deqa naŋgi damu uyosaieqnub. Kalil getenteqnub. Ariya tamo ungasari qudei Yesus qa naŋgo areqalo siŋgilateqnub qaji naŋgi qalie, naŋgi iŋgi kalil uyeqna kere. Osib naŋgi iŋgi kalil uyeqnub. Naŋgi iŋgi bei getentosaieqnub.

³ Deqa niŋgi quiy. Tamo ungasari iŋgi kalil uyeqnub qaji naŋgi na olo tamo ungasari damu getenteqnub qaji naŋgi uge qa minjraib. Tamo

unjasari damu getenteqnub qaji naŋgi na kamba dego tamo ungasari ingi kalil uyeqnub qaji nangi uge qa minjraib. Qotei na nangi kalil elenjej.

⁴ Ni tamo kiyero deqa ni tamo bei aqa kaŋgal tamo a uge qa minjqam? A wau bole yqas kiyo aqa wau ulonqas kiyo di aqa wau qa gate a segi na pegiyqas. E are qalonum, kaŋgal tamo di a wau bole yqa kere. Tamo Koba Qotei na a sinjila yimqa a wau bole yqas.

⁵ Tamo bei a endegsi are qalqas, “Bati qudei yori bati kokba. Bati qudei bati laŋaj.” Ariya tamo bei a marqas, “Sai. Bati kalil kerekere unub.” O ijo was, ningi segi segi nunjo areqalo geregere tenemtosib areqalo bole ti soqniy.

⁶ Tamo qudei naŋgi yori bati kokba uneqnub di naŋgi Tamo Koba a qa are qaloqnsib deqa uneqnub. Tamo qudei naŋgi ingi kalil uyeqnub di naŋgi Tamo Koba a qa are qaloqnsib deqa uyeqnub. Naŋgi ingi uyqa oqnsib Qotei pailyoqnsib uyeqnub. Tamo qudei naŋgi ingi qudei getenteqnub. Di naŋgi Tamo Koba a qa are qaloqnsib deqa getenteqnub. Naŋgi ingi getentqa oqnsib Qotei pailyoqnsib getenteqnub.

⁷ Iga qalie, tamo bei a endegsi marqa keresai, “Ijo ɻambile di ijo segi ɻambile. E segi na taqatejunum. E moiqai di e segi na marsiy moiqai.” A degsi marqa keresai.

⁸ Iga ɻambile sqom di iga Tamo Koba a qa are qalsim ɻambile sqom. Iga moiqom di iga Tamo Koba a qa are qalsim moiqom. Deqa iga ɻambile sqom kiyo iga moiqom kiyo di iga Tamo Koba aqa segi tamo ungasari sqom.

9 Kristus a dego moisiq olo ḥambile osiq subq na tigelej. Deqa a tamo ḥambile so qaji naŋgi ti tamo moreňo qaji naŋgi ti naŋgo Tamo Koba gaigai sqas.

10 Niŋgi kiyaqa nunŋo Kristen was naŋgo kumbra pegiyoqnsib uge qa minjreqnub? Osib nangi misiliŋnjreqnub? Niŋgi qalie, mondoŋ iga kalil Qotei aqa ulatamuq di tigelamqa a na iga pegig-was.

11 Agi Qotei aqa anjam bei nami endegsib neŋgreŋyeb unu, “E segi Tamo Koba. E ḥambile gaigai unum. Mondoŋ tamo ungasari kalil nangi ijoq bosib ijo areq di siŋga pulutosib naŋgo med-abu qujaitosib merbqab, ‘Ni segi Qotei.’”

12 Qotei aqa anjam degsi unu deqa iga qalieonum, diŋo bati qa iga segi segi kalil Qotei aqa ulatamuq di tigelosim gago kumbra kalil babtosim minjnam a quqwas.

Niŋgi nunŋo Kristen was naŋgi kumbra ugeq breinjraib

13 Deqa iga gago Kristen was naŋgi uge qa minjrqasai. Osim nangi uneq breinjrqasai.

14 Tamo Koba Yesus na e powo ebej deqa e qalieonum, ingi ingi kalil Qotei na gereiyelenej qaji di jiga bei saiqoji. Ariya Kristen was bei a endegsi are qalqas, “Ingi di jigat.” A degsi are qalsim deqa a ingi di getentqas.

15 Ariya a ingi di getentimqa niŋgi olo ingi di uyib nunjsimqa a are gulbeiyqas. Nunŋo kumbra dena niŋgi qalaqlaiyo kumbra uratosib nunŋo Kristen was aqa are gulbetetqab. Kristus a nunŋo was di qalaqlaiyosiq moiyej deqa niŋgi nunŋo ingi uyo qa osib a ugeugeiyaib.

16 Niñgi mareqnub, “Iga ingi di uyqom di kumbra bole.” Di niñgi kere mareqnub. Ariya nunþo kumbra bole di Kristen was qudei nañgi unsib olo uge qa marqab di kerasai. Deqa uñgum, niñgi ingi di uyaib.

17 Mondor Bole na aqaryaigimqa iga kumbra bole ti lawo kumbra ti arebolebole ti sqom gam dena Qotei a gago Mandor Koba sosim iga taqat-gwas. Iga ingi ti ya ti uyoqnqom gam dena sai.

18 Tamo nañgi ijo anjam deqa are qalsib Kristus aqa wau ojqab di Qotei a nañgi qa tulan̄ areareto-qnqas. Amqa tamo ungasari kalil nañgi na nañgi unjrsib marqab, “Nañgi tamo bole.”

19 Deqa iga kalil lawo na sosim gago Kristen was nañgi siñgilatnjroqnqom.

20 Niñgi ingi uyo na Qotei aqa wau ugetaib. Bole, niñgi ingi kalil uyqa kere. Ariya niñgi ingi bei uysib dena nunþo Kristen was bei uneq waiyqab di kumbra uge.

21 Niñgi damu ti wain ti uysibqa kiyo kumbra bei ysibqa kiyo dena nunþo was bei uneq waiyqab di kumbra uge. Deqa niñgi kumbra di uratiy.

22 Niñgi Qotei qa nunþo areqalo siñgilateqnub deqa niñgi qalie, niñgi ingi kalil uyqa kere. Ariya nunþo qalie di nunþo are miligiq di ultib soqnem. Yim Qotei a segi unqas. Niñgi ingi bei uyqa marsib are gulbeinþwasai di niñgi arebolebole na uiy.

23 Ariya nunþo ambleq di tamo bei a ingi bei uyqa osim are gulbeiyim uyqas di a une ti sqas. A Qotei qa aqa areqalo siñgilateqnu ariya a ingi di uyqa osim are gulbeiyim uyqas di a une atqas.

15

Niñgi Kristus aqa kumbra dauryoqniy

¹ Tamo uñgasari qudei Yesus qa nañgo areqalo singilateqnub qaji nañgo areqalo di kiñala siñgilaosai unu. Deqa iga siñgila ti unum qaji iga na nañgi aqaryainjroqnsim nañgo gulbe qoboiyetnjroqnsim. Iga gago segi jejamu aqaryaiyqajqa are qalqasai.

² Iga gago Kristen was nañgi aqaryainjroqnsim singilatnjroqnsim.

³ Iga qalie, Kristus a degó aqa segi jejamu aqaryaiyosaioqnej. A nami endegsi Qotei pailyej, “O Abu, tamo qudei ni qa anjam uge mareqnub qaji nañgi e qa degó anjam uge mareqnub.” Qotei aqa anjam di agi neñgrenq di unu.

⁴ Qotei aqa anjam kalil nami neñgrenyeb qaji di iga Qotei aqa gam osorgwajqa deqa osib neñgrenyeb. Anjam dena gago are singilatetgim iga siñgila na tigeloqnsim Qotei na mondoñ iga elenqajqa deqa tarinjoqnsim sqom. Utru deqa neñgrenyeb.

⁵ Qotei a segi na gago are singilatetgoqnsiq aqaryaiqeinqaqa iga siñgila na tigeleqnum. Deqa a na marimqa ningi kalil koba na Kristus Yesus aqa kumbra dauryosib areqalo qujaitosib soqniy.

⁶ Sosib ningi kalil medabu qujaitoqnsib gago Tamo Koba Yesus Kristus aqa Abu Qotei aqa ñam soqtoqniy.

Kristus na Juda nañgi ti sawa bei bei qaji nañgi ti aqaryainjrej

⁷ Kristus a ningi qa areboleboleiyonaq ningi gereinjej degó kere ningi nuñgo Kristen was nañgi

qa areboleboleinqim gereinjroqniy. Yim nuŋgo kumbra dena niŋgi Qotei aqa ñam tulaj soqtoqniy.

⁸ E endegsi marqai. Kristus a Juda naŋgi qa are qalsiq wauoqnej. Qotei aqa anjam kalil bole. A nami Juda naŋgo moma utru naŋgi iŋgi bole bole enjrqa marej. Anjam di singilatqajqa deqa Kristus a wauoqnej.

⁹ Kristus a sawa bei bei qaji naŋgi qa dego wauoqnej. Qotei a naŋgi qa dulej aqa kumbra di naŋgi qaliesib aqa ñam soqtqajqa deqa Kristus a wauoqnej. Agi Kristus aqa anjam bei nami endegsib neŋgreŋyeb unu,

“E sawa bei bei qaji naŋgo ambleq di ino ñam soqtoqnqai.

E ino ñam soqtqa oqnsiy ni qa louoqnqai.”

¹⁰ Anjam bei degó unu, “O sawa bei bei qaji niŋgi ti Qotei aqa segi tamo ungasari kalil naŋgi ti koba na areboleboleinqim soqniy.”

¹¹ Anjam bei degó unu,
“O sawa bei bei qaji kalil,
niŋgi Tamo Koba aqa ñam soqtoqniy.
Od, niŋgi kalil aqa ñam soqtoqniy.”

¹² Aisaia a degó Qotei aqa medabu osiqa anjam bei endegsi marej, “Mondoŋ Devit aqa abu Jesi aqa moma naŋgoq dena mandor kobaquja bei brantqas. Brantosim a na sawa bei bei qaji kalil naŋgi taqatnjroqncas. Naŋgi a bosim boletnjqajqa deqa are qalsib tariŋoqnsib sqab.”

¹³ O ijo was, Qotei a nami iga iŋgi bole bole egwajqa marej deqa iga tariŋoqnsim unum. Niŋgi Qotei qa nuŋgo areqalo singilateqnub deqa a na niŋgi tulaj keretŋgimqa niŋgi arebolebole ti are

lawo na ti soqniy. Amqa Mondor Bole na ningi singilatnqimqa ningi ingi bole bole Qotei a nami enjwa marej qaji deqa tarinjoqnsib soqniy.

Pol a Qotei aqa wau ojoqnej deqa a tulan areboleboleiyoqnej

14 O ijo was kalil, ijo are miliq di e qalieonum, ningi kumbra bole gaigai yeqnub. Ningi powo koba ti unub deqa ningi Qotei aqa tamo ungasari naŋgi gam bole osornjreqnub.

15 Qotei a e qa are boleiyonaq wau ebej deqa e anjam singila endi nengreŋyosim nunqoq qarinjyonum. Niŋgi ijo anjam endeqa are walŋgaim deqa e nengreŋyonum.

16 E Kristus Yesus aqa wau tamо unum deqa e sawa bei bei qaji naŋgo ambleq di waquoqnsim Qotei aqa anjam bole naŋgi minjre minjre laqnum. E naŋgi joqsiy Qotei aqa ulatamuq di atrainjrobilitqa Qotei a naŋgi qa tulan areboleboleiyqajqa deqa e waueqnum. Mondor Bole na naŋgi singilatnjrimqa naŋgi Qotei aqa segi kumbra boleq di sosib dauryqajqa deqa ti e naŋgi qa waueqnum.

17 Aqo Kristus Yesus wo ombla waueqnum deqa e Qotei aqa wau yqajqa tulan areboleboleibeqnu.

18-19 Kristus a nami ijo medabu na ti ijo baŋ na ti wau yoqnej. Wau deqa segi e niŋgi saingwai. E wau bei qa niŋgi saingwasai. Kristus na e singila ebeqnaqa e maŋwa gargekoba yoqnem. Qotei aqa Mondor na dego e singilatbeqnaqa e waquoqnm. Kristus a kumbra kalil di yoqnej. Di kiyaqa? A na sawa bei bei qaji naŋgo are tigeltnjrimqa naŋgi Qotei aqa anjam dauryqajqa deqa. E Jerusalem dia wau

utru atsim Kristus aqa anjam bole mare mare laqnsim gilsim torei Ilirikum sawaq di diñtem.

²⁰ E are qalem, e na tamo ungasari Kristus aqa ñam qaliesai qaji nañgo sawaq di Qotei aqa anjam bole palontoqnqai. Tal ai utru tamo bei na tigeltej qaji gogeq di e olo tal atqasai. E degsi are qalem.

²¹ Agi Qotei aqa anjam bei endegsi neñgrenq di unu, “Tamo ungasari Kristus aqa ñam nami quosai qaji nañgi a unqab. Tamo ungasari aqa anjam nami quosai qaji nañgi quisib a qa poinjrqas.”

Pol a Rom Kristen nañgi unjrsim dena Spen sawaq gilqas

²² O ijo was, e Qotei aqa wau di ojeqnum deqa e nuñgoq bqajqa gam geteñejunu. Deqa e nuñgoq bqa yeqnam keresaiibeqnu.

²³ Wausau gargekoba e ninji nuñgwaqqa are qaloqnam. Ariya bini e sawa endia wau bei saiqoji.

²⁴ Deqa e Spen sawaq gilqa osiy e mati nuñgoq bosiy nunjsiy ninji ti koba na sokiñalayitqa ninji ingi ingi qa aqaryaibibqa e Spen sawaq gilqai.

²⁵ Ariya e mati Jerusalem aisiy dia Juda Kristen nañgi unjrsiy aqaryainjrqai. Nañgi Qotei aqa segi tamo ungasari unub.

²⁶ Nañgi qudei ingi ingi qa truqueqnub deqa Kristen was Masedonia sawa ti Akaia sawa ti di unub qaji nañgi na nañgi aqaryainjrqai marsib silali koroiyeb unu.

²⁷ Nañgi nañgo segi areqalo na silali di koroiyeb. Juda Kristen nañgi na nañgi Qotei aqa anjam qa aqaryainjreqnub deqa nañgi na kamba olo Juda

Kristen naŋgi jejamu qa iŋgi iŋgi qa aqaryainjre-qnub. Naŋgo wau bole agide.

²⁸ Deqa e mati silali koroiyqajqa wau di kobotsiy silali di Jerusalem osiy aisiy bunuqna e Spen sawaq gilqa osiy e nuŋgoq bosiy nuŋgwai.

²⁹ E qalieonum. E nuŋgoq bqai di e Kristus aqa kumbra bole kalil ijoq di maqejunu qaji di osi bosiy niŋgi osornjetqa dena niŋgi siŋilaqab.

³⁰ O ijo was niŋgi gago Tamo Koba Yesus Kristus a qa ti qalaqlaiyo kumbra Mondor na iga osorgeqnu qaji deqa ti are qalsibqa e koba na Qotei pailyqajqa waukobaoqnqom. Od, niŋgi e qa Qotei pailyoqniy.

³¹ Yim Qotei na e aqaryaibosim anjam gotraŋyo tamo Judia sawaq di unub qaji naŋgo banq dena e olo oqas. E Qotei aqa segi tamo uŋgasari Jerusalem di unub qaji naŋgi qa silali koroiyeqnum. Niŋgi Qotei paɪlyibqa a na naŋgo are tigelteqrimqa naŋgi ijo wau deqa tuləŋ areboleboleinjrqas.

³² Qotei na marim e nuŋgoq bosiy nuŋsiy dena e areboleboleibqas. Osiy niŋgi koba na aqaratosim dena e siŋila oqai.

³³ Qotei a are lawo qa utru. A niŋgi kalil koba na soqnebe. Bole.

16

Pol a kaiye anjam Rom Kristen naŋgoq qarinŋej

¹ Niŋgi gago jaja Fibi osib gereyoqniy. A na Kristen tamo uŋgasari Senkria qureq di unub qaji naŋgi qa waukobaeqnu.

² Niŋgi Tamo Koba a qa are qalsib Fibi qalaqlaiyoqniy. Niŋgi Qotei aqa segi tamo

unjasari unub deqa ningi kumbra bole dauryosib Fibi qalaqlaiyoqniy. Fibi a gulbe ti soqnimqa kiyo ingi bei qa truquamqa kiyo niŋgi na aqaryaiiy. A nami tamo unjasari gargekoba naŋgi aqaryainjroqnsiq e dego aqaryaiboqnej. Deqa ningi a urataib. A kamba dego aqaryaiiy.

³ Niŋgi na ijo kaiye anjam endi osib Prisila Akwila wo naŋgi aiyel minjriy. Naŋgi aiyel e koba na Kristus Yesus aqa wau ojeqnum.

⁴ Nami jeu tamo naŋgi na e lubqa laqnab naŋgi aiyel moiqa ulaosai. Naŋgi e aqaryaibeb. Deqa e naŋgi aiyel minjreqnum, “Keretonub.” E segi sai. Kristen tamo unjasari sawa sawa kalilq di unub qaji naŋgi dego naŋgi aiyel minjreqnub, “Keretonub.”

⁵ Ariya niŋgi na ijo kaiye anjam endi osib Kristen tamo unjasari kalil Prisila Akwila wo naŋgo talq di loueqnub qaji naŋgi dego minjriy.

Osib Epainetus dego ijo kaiye anjam endi minjiy. E a tulaŋ qalaqlaiyeqnum. A Esia sawa qaji. Tamo kalil Esia sawaq di unub qaji naŋgi are bulyosaisonabqa Epainetus a namoqna are bulyosiq Kristus qa aqa areqalo siŋgilatej.

⁶ Niŋgi na ijo kaiye anjam endi osib Maria dego minjiy. A niŋgi aqaryainjwa maroqnsiq waukobaoqnej.

⁷ Niŋgi na ijo kaiye anjam endi osib Andronikus Junias wo naŋgi aiyel dego minjriy. Naŋgi aiyel ijo len naŋgi. Jeu tamo naŋgi na naŋgi aiyel e ombla ojeleŋosib tonto talq di breigonab soqnem. Qotei na naŋgi aiyel wau enjrej deqa naŋgi aqa anjam mare mare laqnub. Deqa naŋgi aiyel dego ñam

ti. E are bulyosaisonam naŋgi aiyel namoqna are bulyosib Kristus qa naŋgo areqalo singilateb.

⁸ Ariya ningi ijo kaiye anjam endi Ampliatus dego minjiy. E Tamo Koba aqa ñam na a tulan qalaqalaiyeqnum.

⁹ Niŋgi Urbanus dego ijo kaiye anjam endi minjiy. A iga ti koba na Kristus aqa wau ojeqnum. Niŋgi Stakis dego ijo kaiye anjam endi minjiy. E a tulan qalaqalaiyeqnum.

¹⁰ Niŋgi Apeles dego ijo kaiye anjam endi minjiy. Iga qalieonum, a bole Kristus dauryeqnu.

Niŋgi ijo kaiye anjam endi osib Aristobulus aqa tal qujai naŋgi ti dego minjriy.

¹¹ Osib Herodion a dego ijo kaiye anjam endi minjiy. A ijo leŋ.

Niŋgi ijo kaiye anjam endi osib Narsisus aqa tal qujai naŋgi ti dego minjriy. Naŋgi Tamo Koba aqa tamo bole unub.

¹² Niŋgi Trifina Trifosa wo naŋgi aiyel dego ijo kaiye anjam endi minjriy. Naŋgi aiyel Tamo Koba a qa waukobaeqnum.

Niŋgi ijo kaiye anjam endi osib Persis dego minjiy. E a tulan qalaqalaiyeqnum. A Tamo Koba aqa wau singila na ojeqnu.

¹³ Niŋgi ijo kaiye anjam endi Rufus dego minjiy. A tamo bolequja sosiq Tamo Koba dauryeqnu. Niŋgi aqa ai dego ijo kaiye anjam endi minjiy. A ijo ai bul.

¹⁴ Niŋgi ijo kaiye anjam endi osib Asinkritus, Flegon, Hermes, Patrobas, Hermas naŋgi minjriy. Osib Kristen was kalil naŋgi koba na unub qaji naŋgi dego minjriy.

15 Osib Filologus Julia wo naŋgi aiyel dego ijo kaiye anjam endi minjriy. Niŋgi na ijo kaiye anjam endi osib Nereus na aqa jaja na Olimpas na ariya Qotei aqa tamo ungasari kalil naŋgi koba na unub qaji naŋgi ti minjriy.

16 Niŋgi na nungo Kristen was kalil naŋgi segi segi kundoqnjriy. Kumbra di agi Qotei aqa segi tamo ungasari kalil naŋgi yeqnub.

Kristus aqa tamo ungasari qure qure kalilq di unub qaji naŋgi na dego niŋgi kaiyeinjgonub.

Tamo qudei na Kristen naŋgi potoaiyeltnjreqnub

17 O ijo was, nungo ambleq di tamo qudei naŋgi Qotei aqa anjam niŋgi nami quisib dauryeb qaji di gotraŋyoqnsib olo bubulyeqnub. Osib Kristen naŋgi potoaiyeltnjroqnsib uneq breinjreqnub. Deqa e niŋgi singila na endegsi merŋgwai. Niŋgi tamo deqaji naŋgi qa geregere ɣam atoqnsib naŋgi qoreinjriy.

18 Tamo deqaji naŋgi gago Tamo Koba Kristus aqa wau ojosaeqnub. Naŋgi nango segi jejamu qa kumbra qa are qaloqnsib dauryeqnub. Osib tamo ungasari naŋgi walawalainjroqnsib gisa gisaŋjroqnsib naŋgi nanaritnjreqnub. Tamo ungasari naŋgi di kumbra bole ti kumbra uge ti geregere pegiyosaieqnub.

19 O ijo was, e niŋgi qa tulan areboleboleibeqnu. Di kiyaqa? Niŋgi Qotei aqa anjam geregere dauryeqnab tamo ungasari kalil naŋgi deqa queqnub. Ariya e niŋgi endegsi merŋgwai. Niŋgi kumbra bole yqajqa geregere poiŋgoqnim kumbra uge yqajqa nanariosib soqniy.

20 Qotei a are lawo qa utru. Sokiñala a na Satan ojsim osi bosim nun̄go siñgaq di atim niñgi na sosqab.

Gago Tamo Koba Yesus a niñgi qa are boleiyeme.

Tamo qudei na kaiye anjam Rom Kristen nañgoq qarinjyeb

21 Timoti a e ombla wauo qaji. A na niñgi kaiyeinqwo. Lusius na Jeson na Sosipater na nañgi qalub dego niñgi kaiyeinqonub. Nañgi qalub ijo leñ nañgi.

22 Ijo ñam Tertius. E Pol aqa medabuq na anjam kalil endi osim ijo segi bañ na neñgrenyonum. E dego Tamo Koba aqa ñam na niñgi kaiyeinqonum.

23 Gaius a degó niñgi kaiyeinqwo. A na e osiqa aqa segi talq di e gereibeqnu. Osiqa Kristen tamo ungasari kalil qure endia loueqnub qaji nañgi dego gereinjreqnu.

Erastus Kwartus wo nañgi aiyel degó niñgi kaiyeinqonub. Erastus a Korin qure nañgo silali taqateqnu qaji tamo. Kwartus a gago Kristen was.

24 Gago Tamo Koba Yesus Kristus a niñgi kalil qa are boleiyeme. Bole.

Iga Qotei aqa ñam soqtoqnqom

25 Yesus Kristus aqa anjam bole e mare mare laqnum qaji dena Qotei na niñgi torei siñgilañgwa kere. Tularñ nami Kristus aqa anjam bole di ulieso-qnej.

26 Ariya bini Qotei na anjam di boleq ateqnu. Qotei ñambile gaigai unu qaji a marnaqa aqa medabu o qaji tamo nañgi anjam di neñgrenyonab soqnej. Sonaqa iga na olo osim tamo ungasari

sawa sawa kalilq di unub qaji naŋgi minjre minjre laqnum. Deqa naŋgi uli anjam di quoqnsib poinjreqnu. Qotei na anjam di boleq ateqnu. Di kiyaqa? Tamo ungasari sawa bei beiq di unub qaji naŋgi anjam di qusib naŋgo areqaloq di siŋgilatosib dauryqajqa deqa.

²⁷ Qotei qujai di a powo koba ti unu. Deqa iga bati gaigai Yesus Kristus aqa wau na Qotei aqa ñam soqtoqnqom. Bole.

**Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014**

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 28 Dec 2024 from source files dated 31 Aug 2023

0eb339dc-c20a-5065-9483-338933d97585